

# मर्कूससे भिबा थार्बा पिन्बा समाचार

## चु किताबला बारेरी पाङ्तोःमा

**भिबा म्हि:** मर्कूस भिबा यूहन्नासे भिबा मुबा। थे येशूला मुल चेला सिमोन पत्रुसला हो मुबा (१ पत्रुस ५:१३)। थे बारनाबास ओच्छे पावलदेन छ्याम थार्बा पिन्बा समाचार थेःना लबारी निबा मुबा (मुल चेला १२:२५)।

**भिबा ग्ला:** रोम शहररी भिबा मुबा।

**भिबा साल:** ओस्पन ईश्वी संवत् ६०-६५ (विक्रम संवत् ११७-१२३) सालला गुडरी भिबा हिन्ना। थे धुइरी स्त्रीष्टियानगदेदा रोमीगदेसे ल्हानान दुख पिन्बा मुबा। चु थार्बा पिन्बा समाचार जम्मान भन्दा डाच्छा भिबा मुबा।

**खाल्दा भिबा:** येशू परमेश्वरला भा हिन्ना भिसी उन्बाला लागिरी अर्गु यहलला म्हिगदेदा भिबा मुबा।

चु थार्बा पिन्बा समाचाररी येशूसे लबा गेदेन थेला अधिकारला बारेरी भिबा मुला। येशूसे लोप्बा तामगदेग्याम, म्हड म्हुड ताप्बा तामगदेग्याम, म्हिगदेला पाप माफ लबा तामगदेग्याम येशू चा अधिकार याङ्बा म्हि हिन्ना भिसी था याङ्खम्ला। ओच्छे येशूसे म्हिगदेदा पापग्याम सोना लबारी हाडला ज्याननोन पिन्बारी खबा “परमेश्वरसे पुडखबा म्हि” हिन्ना भिसी सुङ्बा मुला।

चुरी येशूसे पिन्बा अर्तीला तामदेन लोप्बा तामगदे भन्दा थेसे लबा गेगदेला बारेरी ल्हानान भिबा मुला। बप्तिस्मा पिन्बा यूहन्नाला बारेरीदेन येशूसे किन्बा बप्तिस्माला बारेरी ओच्छे शैतानसे येशूला सेम च्याबा तामला बारेरी तिगै ताम पाङ्माहेन्से तुरुन्तन येशूसे म्हिगदेदा खम्ना लबादेन लोप्बा तामला बारेरी घोना लबा मुला। थेहङ् लसीन लिच्छा येशूला चेलागदेसे येशूदा ज्यना लसी

डोसेजी। तर येशूदा बिरोध लबागदेसे चा येशूदा भन बिरोध लबारी छ्याइजी।  
 चु किताबला थुमरी येशूला लहुइरी तबा लिच्छाला साताला तामगदेदेन क्रुसरी  
 टागब लसी साइबा ओच्छे सिबाग्याम दोःसी सोबा तामला बारेरी भिबा मुला।

### मुल तामगदे

- थार्बा पिन्बा समाचार थेःना लबा १:१-१३
- येशूसे गालील अञ्चलरी लबा गे १:१४-६:५०
- येशू गालील अञ्चलहेन्से यरूशलेम शहरधोना फेप्बा १०:१-५२
- यरूशलेम शहररी येशूला गे थुम्बा धुइ ११:१-१५:४७
- येशू सिबाग्याम सोबा १६:१-८
- येशू सिबाग्याम सोमाहेन्से चेलागदे मुबा ग्लारी फेप्खबादेन येशू  
 स्वर्गरी फेप्बा १६:६-२०

# मर्कुससे भिबा थार्बा पिन्बा समाचार

बप्तिस्मा पिन्बा यूहन्नासे थेःना  
लबा थार्बा पिन्बा समाचार

मत्ती ३:१-१२; लूका ३:१-६, १५-१७;  
यूहन्ना १:१६-२८

१ परमेश्वरला भा येशू ख्रीष्टला  
बारेला थार्बा पिन्बा समाचार  
चुहङ् लसी शुरु तजी। २ यशैया भिबा  
अगमवक्ताला किताबरी परमेश्वरसे  
चुहङ् भिसी सुड्बा मुला,

“च्यागो, डाइ डाला समाचार  
भोर्बा म्हिदा एला डाच्छा  
डाच्छा पुइखला।

थेसे एला ग्याम स्होला।\* ”

३ तोडतोडबा ग्लारीक्यार म्हि गिक  
क्रिड्बान,

“परमप्रभुला ग्याम तयार लउ,  
ओच्छे परमप्रभु भ्रबाला लागिरी  
थेला ग्याम सोजो स्होउ।”\*

४ चु म्हि बप्तिस्मा पिन्बा यूहन्ना  
हिन्ना। थेसे तोडतोडबा ग्लारीक्यार

खसी म्हिगदेदा “दाहेन्से एनीगदे हाड  
हाडला पाप ख्लासी परमेश्वरपट्टि  
दोःसी बप्तिस्मा किन्गो। परमेश्वरसे  
एनीगदेला पापला दोष मेटब लला।”  
भिबान थार्बा पिन्बा समाचार थेःना  
लजी। ५ यरूशलेमदेन यहूदिया  
यहुल्साला जम्मान म्हिगदे यूहन्ना मुबा  
ग्लारी खसी, दाहेन्से डनी हाड हाडला  
पाप ख्लासी परमेश्वरपट्टि दोःला भिसी  
यर्दन स्योडरी यूहन्नाग्याम बप्तिस्मा  
किन्जी। ६ यूहन्नासे ऊँटला क्राला क्वान  
क्वान्मुबा ओच्छे ढिला पेटी खीमुबा।  
थेसे तिरीदेन हि सिडसोरला खुदु  
चमुबा।\* ७ थेसे म्हिगदेदा चुहङ् भिसी  
पाङ्जी, “डा भन्दा लिच्छा फेप्खबान  
लबा चा डा भन्दान शक्तिशाली मुला।  
डा कू तसी थेला लखमला तुना  
ब्लबाधोनाला आरे। ८ डाइ एनीगदेदा  
क्युङ्ग्याम बप्तिस्मा पिन्बा मुला, तर  
थेसे एनीगदेदा परमेश्वरला आत्मासे  
बप्तिस्मा पिन्ना।”

### येशूसे यूहन्नाग्याम बप्तिस्मा किन्बा

मत्ती ३:१३-१७; लूका ३:२१-२२

६थेनोन धुइरी येशू गालील अञ्चलला नासरत नाम्साग्याम फेप्खजी, ओच्छे यर्दन स्योडरी यूहन्नाग्याम बप्तिस्मा किन्जी। १०यूहन्नाग्याम बप्तिस्मा किन्सी क्युइग्याम थोन्मैछ्याम येशूसे स्वर्ग ठोड्बा म्राड्जी ओच्छे परमेश्वरला आत्मा ढुकुर हड् लसी हाडथोरी फाप्खबान लबा म्राड्जी। ११ओच्छे स्वर्गग्याम “ए डाइ सेमहेन्से माया लबा डाला भा हिन्ना, थेतबासेलमा डा एदा म्राड्सी ल्हानान ताड्बा मुला” भिबा काइ खजी।\*

### शैतानसे येशूदा फसब लबारी म्हाइबा

मत्ती ४:१-११; लूका ४:१-१३

१२जमाहेन्से परमेश्वरला आत्मासे येशूदा तोडतोडबा ग्लारी भोर्जी। १३येशू बोगल न्ही धिनधोना थेरीन धन्छ्याजी। थेनोन धुइरी शैतानसे थेदा फसब लबारी थेला सेम च्याजी। थे हीला जन्तुगदेदेन छ्याम मुबा ओच्छे स्वर्गदूतगदेसे थेदा क्योड्जी।

### येशूसे डाच्छा धम्बा चेलागदे

मत्ती ४:१२-२२; लूका ४:१४-१५; ५:१-११

१४बप्तिस्मा पिन्बा यूहन्नादा भयाल्खानरी थान्माहेन्से येशूसे

परमेश्वरला यहुल्साला समाचार थे:ना लबान गालील अञ्चलरी फेप्जी। १५“दाहेन्से धुइ योसी जिन्बा मुला, ओच्छे परमेश्वरला यहुल्सा खबा धुइ तसी जिन्बा मुला। थेतबासेलमा एनीगदे हाड हाडला पाप रूलासी परमेश्वरपट्टि दो:गो। ओच्छे थाबा पिन्बा समाचाररी विश्वास लउ” भिसी येशूसे सुड्जी।\*

१६येशू गालील समुन्द्रला कुनीन कुनी फेप्बान लमा थेसे सिमोनदेन थेला आले अन्द्रियासदा तार्डा साइबारी समुन्द्ररी घ्याड क्लाडुबान लबा म्राड्जी। तिगदा भिसम थेनीगदे तार्डा साइबा म्हिगदे मुबा। १७येशूसे थेनीगदेदा “डादेन छ्याम भ्रउ, दाहेन्से डाइ एनीगदेदा तार्डा चुड्बा म्हि आहिन, तर म्हिगदेदा परमेश्वर मुबा ग्लारी भबा म्हि स्होला” भिसी सुड्जी। १८येशूसे थेहड् सुड्मैछ्याम हाडला घ्याड रूलासी थेनीगदे येशूदेन छ्याम भ्रजी। १९जजाकी क्याथाड धोमाहेन्से येशूसे जब्दियाला भा न्ही, याकूबदेन थेला आले यूहन्नादा दोंगारी चिसी घ्याड राबान लबा म्राड्जी। २०येशूसे थेनीगदेदा म्राड्मैछ्याम “डादेन छ्याम खउ” भिसी ड्योइजी, ओच्छे थेनीगदेसे हाडला आबा जब्दियादा दोंगारी मुबा कुल्लीगदेदेन छ्याम रूलासी येशूदेन छ्याम भ्रजी।

## येशूसे म्हडसे स्याप्बा म्हिदा खम्ना लबा

लूका ४:३१-३७

२१ जमाहेन्से थेनीगदे कफर्नहुम भिबा शहररी फेप्जी। ओच्छे बलप्बा न्हबा धिनकुनु येशू यहूदीगदे हुप तबा दिमरी फेप्सी परमेश्वरला बचनग्याम लोप्बारी छ्याइजी। २२ येशूसे लोप्बा म्राड्सी म्हिगदे उदेक तजी। तिग्दा भिसम येशूसे यहूदी धर्मगुरुगदेसे लोप्बा हड लसी आहिन, तर अधिकार मुबा म्हिसे हड लसी लोप्बा मुबा। \* २३ थेनोन धुइरी यहूदीगदे हुप तबा दिम न्हडग्याम म्हडसे स्याप्बा म्हि गिक चुहड् भिबान क्रिड्जी, २४ “नासरतला येशू, हाडसे डन्दा तिग लबारी म्हाइबा? तिग हाड डन्दा साइबारी फेप्खबा हिन्ना? हाड परमेश्वरसे पुइखबा परमेश्वरला म्हि भिसी डादा था मुला।” २५ येशूसे थे म्हडदा बड्सी, “कुटिसी चिउ! थे म्हिग्याम थोन्सी निउ!” भिसी २६ सुड्मैछ्याम थे म्हिदा लछार पछार लसी क्रिड्बान थे म्हिग्याम म्हड थोन्सी निजी। २७ चु म्राड्सी थेरी मुबा जम्मान म्हिगदे उदेक म्हन्जी। ओच्छे हाड हाड न्हडरी चुहड् भिबारी छ्याइजी, “आहिन, चु तिग? चु मी अधिकार लसी लोप्बा छार ताम गा चीम।

थेसे कुल्बा ताम म्हडगदेसे एनोन ड्यान्बा चीम।” २८ चुहड् तमैछ्याम येशूसे लबा उदेकला गेला बारेरी गालील अञ्चलला जम्मान ग्लारी थे:जी।

## येशूसे ल्हानान म्हिगदेदा खम्ना लबा

मत्ती ८:१४-१७; लूका ४:३८-४१

२९ ओच्छे येशू यहूदीगदे हुप तबा दिमग्याम थोन्सी याकूब, यूहन्नादेन छ्याम सिमोनदेन अन्द्रियासला दिमरी फेप्जी। ३० थे धुइरी सिमोनना स्युमी छवा खसी म्हेर्सी चिबा मुबा। ओच्छे थेनीगदेसे थे ताम येशूदा पाड्जी। ३१ थेतबासेलमा येशू सिमोनना स्युमी मुबा ग्लारी फेप्सी थेला यारी चुड्सी थीजी। जमाहेन्से थेला छवा म्हाजी। ओच्छे थेसे थेनीगदेदा कयोड्बारी छ्याइजी। ३२ जमाकुनु ड्यसे धिनी घल्माहेन्से म्हिगदेसे ल्हानान आखम्बा म्हिदेन म्हडसे स्याप्बा म्हिगदेदा येशू मुबा ग्लारी भजी। ३३ ओच्छे नाम्साला जम्मान म्हिगदे दिमला खाडगारी हुप तजी। ३४ येशूसे ल्हानान खाल्ला रोगसे आखम्बा म्हिगदेदा खम्ना लजी। ओच्छे ल्हानान म्हिला लहुइग्याम म्हड ताप्जी। येशू खाल भिबा ताम थे म्हडगदेसे डोसेबासे लमा येशूसे थेनीगदेदा ताम पाड्आपुड्नी।

## सुनसान ग्लारी येशूसे लबा प्रार्थना

लूका ४:४२-४४

३५ स्थहोरीन मी म्राड्बा भन्दा डाच्छान येशू स्हेड्सी सुनसान ग्लारी प्रार्थना लबारी फेप्जी। ३६सिमोन ओच्छे थेदेन छ्याम मुबागदे जम्मासेन येशूदा म्हाइबान निजी। ३७थेनीगदेसे येशूदा स्याप्माहेन्से “हाडदा जम्मासेन म्हाइबान मुला” भिसी भिजी। ३८येशूसे थेनीगदेदा “लु, य्हाड अर्गु नाम्सारीक्यार निइ, थेरीनोन डाइ थाबा पिन्बा समाचार थे:ना लतो:बा मुला। तिगदा भिसम डा चुलान लागिरी खबा हिन्ना” भिसी सुड्जी। ३९ओच्छे येशू गालील अञ्चलला जम्मान ग्लारी यहूदीगदे हुप तबा दिमगदेरी थाबा पिन्बा समाचार थे:ना लबान म्हिगदेला लहुड्ग्याम म्हाडगदे ताप्बान भ्रजी।\*

## येशूसे कोरे खबा म्हिदा खम्ना लबा

मत्ती ८:१-४; लूका ५:१२-१६

४० ओच्छे कोरे खबा म्हि गिक येशू मुबा ग्लारी खसी पुइ जूबान, “हाडला सेम मुसम हाडसे डादा खम्ना लखम्ला” भिसी भिजी। ४१चु ताम थे:माहेन्से येशूदा दया रे:सी हाडला यासे थेदा थुर्बान, “ए खम्मौ भिबा डाला सेम मुला, ए खम्मो” भिसी सुड्जी। ४२थेनोन धुइरी थे कोरे खबा म्हि खम्जी। ४३-४४ ओच्छे येशूसे

थेदा “एसे चु ताम खालैदा थापाड्गो, बरु निसी परमेश्वरला मन्दिररी पूजा लबा म्हिदा उन्गो। ओच्छे ए खम्जी भिसी म्हिगदेदा उन्बाला लागिरी मोशासे कुल्बा अन्छार परमेश्वरदा बलि फुल्गो” भिसी कुल्जी।\* ४५तर थे म्हि निसी चु ताम जम्मान म्हिदा पाड्जी। जमाहेन्से येशू दो:सी नाम्सारी डाच्छाला हड् लसी फेप्बारी आखम्नी। थेतबासेलमा येशू सुनसान ग्लारी धन्छ्याजी। तर थेरीनोन जम्मान ग्लाग्यामसे म्हिगदे येशू मुबा ग्लारी खजी।

## येशूसे कुज्या म्हिदा खम्ना लबा

मत्ती ९:१-८; लूका ५:१७-२६

२ तिगै धिन लिच्छा दो:सी येशू कफर्नहुम भिबा शहररी फेप्जी। ओच्छे येशू दिमरीन मुला भिबा ताम म्हिगदेसे थे:जी। २जमाहेन्से म्हिला हुल खसी मड्ग्यारहेन्से दिम न्हडधोना चिबा ग्ला आतनी। थेरी येशूसे परमेश्वरला बचन सुड्बान मुबा। ३थेनोन धुइरी गोर बिलि म्हिसे काड या चलब आतबा कुज्या म्हि गिकदा पुइसी येशू मुबा ग्लारी भजी। ४तर म्हिला हुलसे लमा थेनीगदेसे थे कुज्या म्हिदा येशू मुबा ग्लारी धोना लबारी आखम्नी। थेतबासेलमा थेनीगदेसे थे दिमला छाना होक्सी थे कुज्या म्हिदा थेला तीबा नान्बादेन



### येशूसे कुज्या म्हिदा खम्ना लबा (२:५)

छ्यामनोन येशूला डाच्छापट्टि धोना लजी। ५ येशूसे थे म्हिगदेला विश्वास प्राङ्सी कुज्या म्हिदा “कोला, एला पाप माफ तबा मुला” भिसी सुङ्जी।

६-७ येशूसे चुहङ् सुङ्बा प्राङ्सी थेरी मुबा यहूदी धर्मगुरुगदेसे “तिगदा चु म्हिसे चुहङ्बा ताम लबा? चुसे मी हाडसे हाडदान परमेश्वर स्होसी गा ताम लबा चीम, म्हिगदेला पापला दोष परमेश्वरसे जे मेटब लखम्मुला” भिसी सेम न्हड न्हडरी म्हनजी। ८ येशूसे

थेनीगदेला सेमला ताम था याङ्सी थेनीगदेदा चुहङ् भिसी सुङ्जी, “एनीगदेला सेमरी तिगदा चुहङ्बा म्हन्बा?” ९ चु कुज्या म्हिदा ‘एला पाप माफ तबा मुला’ भिबादेन ‘रे:सी भ्रउ, एला तीबा नान्बा पुङ्सी निउ’ भिबा खजिबा चा सजिलो मुला? १०-११ तर च्यागो, परमेश्वरसे पुङ्खबा म्हिदा चु जम्बुलिङरी म्हिगदेला पापला दोष मेटब लबा अधिकार मुला भिबा ताम डाइ एनीगदेदा उन्ना।” जमाहेन्से येशूसे

थे कुज्या म्हिदा “ए रे:गो, ओच्छे एला तीबा नान्बा पुइसी दिमरी निउ” भिसी सुइजी। <sup>१२</sup>येशूसे थेहइ सुइमैछ्याम थे कुज्या म्हि जम्मासेन च्याना च्यानान डोड रे:सी ह्वाडला तीबा नान्बा पुइसी निजी। चु म्नाइसी म्हिगदे उदेक म्हन्सी परमेश्वरदा जयजयकार लबान, “चुहइबाम ग्हाडसे खाइमै म्नाइबा आरे” भिसी भिजी।

### येशूसे लेवीदा इयोइबा

मती ९:९-१३; लूका ५:२७-३२

<sup>१३</sup>दो:सी तिरेम येशू समुन्द्रला कुनीरी फेज्जी। थेरी येशूदा म्नाइसी म्हिला हुल खजी ओच्छे येशूसे थेनीगदेदा लोण्बारी छ्याइजी। <sup>१४</sup>येशू थेग्याम फेण्बा धुइरी अल्फयसला भा लेवीदा तिरो दुइबा ग्लारी चिबान लबा म्नाइजी ओच्छे थेदा “डादेन छ्याम भ्रउ” भिसी सुइजी। जमाहेन्से थे रे:सी येशूदेन छ्याम भ्रजी।

<sup>१५</sup>येशू लेवीला दिमरी सोल छ्योइबान लबा धुइरी तिरो दुइबा म्हिगदे, पापीगदे ओच्छे थेला चेलागदे थेदेन छ्यामनोन चिसी चबान मुबा। तिग्दा भिसम येशूदेन छ्याम भ्रबा म्हिगदे ल्हानान मुबा। <sup>१६</sup>फरिसीदेन यहूदी धर्मगुरुगदेसे येशू पापीगदेदेन तिरो दुइबा म्हिगदेदेन छ्यामनोन धन्छ्यासी चबा म्नाइसी थेनीगदेसे थेला चेलागदेदा “तिग्दा चुसे पापीगदेदेन तिरो दुइबा म्हिगदेदेन छ्याम चिसी चबा?” भिसी इयोइजी।

<sup>१७</sup>चुहइ भिबा ताम थे:सी येशूसे थेनीगदेदा “खम्बा म्हिगदेला लागिरी डाक्टर आतो:, तर आखम्बा म्हिगदेला लागिरी जे तो:ला। थेतबासेलमा परमेश्वरला डाच्छा ज्यबा मुबा म्हिगदेदा आहिन तर पापीगदेदा इयोइबारी डा खबा हिन्ना” भिसी सुइजी।

### येशूसे फोइथान चिसी प्रार्थना लबाला लागिरी लोण्बा

मती ९:१४-१७; लूका ५:३३-३६

<sup>१८</sup>यूहन्नाला चेलागदेदेन फरिसीगदे फोइथान चिसी प्रार्थना लबान लमुबा। थेतबासेलमा कोइ कोइ म्हिगदे खसी येशूदा “यूहन्नाला चेलागदेदेन फरिसीला चेलागदे फोइथान चिसी प्रार्थना लमुला तर ह्वाडला चेलागदेसे चा तिग्दा चुहइ आलबा?” भिसी इयोइजी। <sup>१९</sup>येशूसे थेनीगदेदा चुहइ भिसी सुइजी, “म्हाछार जन्तीगदेदेन छ्याम मुतेधोना खाहइ लसी थेनीगदे फोइथान चिला? दान्देधोना म्हाछार थेनीगदेदेन छ्याम मुला, थेतबासेलमा थेनीगदे फोइथान आचि। <sup>२०</sup>तर म्हाछार जन्तीगदेग्याम फेसी भोर्बा धुइ खला। थे धुइरी थेनीगदे फोइथान चिला।

<sup>२१</sup>“खालैसे बोकटो क्वानरी छार क्वानगेनसे आख्या, छार क्वानगेनसे बोकटो क्वान ख्याजी भिसम बोकटो क्वान भन ढेला। <sup>२२</sup>ओच्छे खालै म्हिसेनोन ढिला बोकटो ताडरी



अडगुरला कलिलो निडगु आयु, युजी भिसम थे ढिला बोक्टो ताड भासी ढेला, ओच्छे अडगुरला निडगु जति डेला। जमाहेन्से ढिला ताडएनोन गे आखेल्ला तला। थेतबासेलमा अडगुरला कलिलो निडगु ढिला छार ताडरी युतोःला।”

### येशू बलप्ला न्हबा धिननाएनोन प्रभु हिन्ना

मती १२:१-८; लूका ६:१-५

२३ बलप्ला न्हबा धिनकुनु येशू बुग्याम फेप्वान मुबा। थे धुइरी थेला चेलागदेसे ग्वाला नम थुबारी छ्याइजी।\* २४ चु म्राड्सी फरिसीगदेसे येशूदा “च्यागो, बलप्ला न्हबा धिनकुनु लबारी आतबा गे थेनीगदेसे तिग्दा लबा?” भिसी इयोइजी। २५ ओच्छे येशूसे थेनीगदेदा “दाऊदसे थेदेन छ्याम मुबा म्हिगदे फोखेन्बा धुइरी थेनीगदेसे तिग लजी? एनीगदेसे खाइमै परमेश्वरला बचन पढब लबा आरे? २६ थेसे परमेश्वरला मन्दिररी पूजा लबा मुल म्हि अबियाथारला पालरी परमेश्वरला दिमरी वाड्सी, परमेश्वरदा फुल्बा गेड चजी, ओच्छे थेसे थेदेन छ्याम मुबा म्हिगदेदाएनोन पिन्जी। तर थे गेड परमेश्वरला मन्दिररी पूजा लबा म्हिगदेदा जे चपुड्मुबा” भिसी सुड्जी।\*

२७ दोःसी येशूसे फरिसीगदेदा “बलप्ला न्हबा धिन म्हिला लागिरी

स्होबा हिन्ना, तर म्हि बलप्ला न्हबा धिनना लागिरी स्होबा आहिन। २८ थेतबासेलमा परमेश्वरसे पुइखबा म्हि बलप्ला न्हबा धिननाएनोन प्रभु हिन्ना” भिसी सुड्जी।

३ दोःसी येशू यहूदीगदे हुप तबा दिमरी वाड्जी। थेरी या खर्बा म्हि गिक मुबा। २ बलप्ला न्हबा धिनकुनु येशूसे थे म्हिला खर्बा या खम्ना लला वा भिसी कोइ कोइ म्हिगदेसे दोष लबाला लागिरी चिवा लसी चिबा मुबा। ३ येशूसे थे या खर्बा मुबा म्हिदा “जम्मालान डाच्छापट्टि राप्पो” भिसी सुड्जी। ४ थेसे थेनीगदेदा “बलप्ला न्हबा धिनकुनु ज्यबा गे लबा कि नइबा गे लबा, म्हि सोना लबा कि सिना लबा खजिबा चा ज्यबा हिन्ना?” भिसी इयोइजी। तर थेनीगदे कुटिसी चिजी। ५ येशूसे ह्वाडला क्युर्सिन मुबा म्हिगदेदा स्हीसी येशूसे थेनीगदेला सेम कोड्बा था याड्सी सेमरी ल्हानान दुख तसी येशूदा बोमो रेःजी। ओच्छे येशूसे थे या खर्बा मुबा म्हिदा “एला या तन्गब लउ” भिसी सुड्जी। ओच्छे थे म्हिसे थेला या तन्गब लमैछ्याम या खम्जी। ६ जमाहेन्से फरिसीगदे थेग्याम थोन्सी निसी येशूदा खाहड् लसी साइबा भिसी हेरोद ग्लेला म्हिगदेदेन छ्याम सल्लाह लजी।

## येशूला लिच्छा म्हिला हुल भ्रबा

मत्ती १२:१५-१६; लूका ६:१७-१९

१७ जमाहेन्से येशू हाडला चेलागदेदेन छ्याम समुन्द्रपट्टि फेप्जी, ओच्छे गालील अञ्चलग्यामसे म्हिला हुल थेला लिच्छा भ्रजी। १८ येशूसे लबा उदेकला गेला बारेरी थे:सी यहूदिया, यरूशलेम, इदुमिआ, यर्दन क्याम्सड्ला ओच्छे टुरोसदेन सीदोन नाम्साला क्यारमारला म्हिगदे येशू मुबा ग्लारी खजी। १९ थेतबासेलमा म्हिगदेसे हाडदा थानाड्गै भिसी येशूसे हाडला चेलागदेदा दोंगा गिक ठीक लपुड्जी। २० तिगदा भिसम येशूसे ल्हानान आखम्बा म्हिगदेदा खम्ना लबासे लमा रोगसे स्याप्बा म्हिगदे येशूदा थुर्बारी तोर हुइ मार हुइ लबान मुबा।\* २१ ओच्छे म्हडसे स्याप्बा म्हिगदेसे येशूदा म्राड्मैछ्याम रल्लुप तसी, “हाड परमेश्वरला भा हिन्ना” भिसी क्रिड्मुबा। २२ तर येशूसे थे म्हिला लहुइरी मुबा म्हडदा “च्यागो, डा परमेश्वरला भा हिन्ना भिसी खालैदा थापाड्गो” भिसी बड्जी।

## येशूसे च्युक न्ही चेलादा धम्बा

मत्ती १०:१-४; लूका ६:१२-१६

२३ येशू गडरी फेप्सी हाडला सेमसे चबा जतिदा ड्योइजी, ओच्छे थेनीगदे थे मुबा ग्लारी खजी। २४ जमाहेन्से

हाडदेन छ्याम भ्रबारी ओच्छे म्हिगदेदा परमेश्वरला यहुल्साला समाचार थे:ना लबारी च्युक न्ही म्हि धम्जी, ओच्छे थेनीगदेदा मुल चेला भिसी सुड्जी। २५ ओच्छे म्हिगदेला लहुइग्याम म्हड ताप्बा अधिकार पिन्जी। २६ येशूसे धम्बा च्युक न्ही मुल चेलागदे चुगदेन हिन्ना, सिमोन भिबादा येशूसे पत्रुस मिन थान्जी। २७ जब्दियाला भा याकूबदेन याकूबला आले यूहन्नादा थेसे बोअनर्गेस भिसी मिन थान्जी। बोअनर्गेस भिबा चा मु घुर्बा हड्बाला भागदे भिबा हिन्ना। २८ ओच्छे अन्द्रियास, फिलिप, बारथोलोमाइ, मत्ती, थोमा, अल्फयसला भा याकूब, ओच्छे थेदियस, सिमोन मुबा। चु सिमोनदा चा हाडला यहुल्सादा माया लबा म्हि भिसी भिमुबा। २९ ओच्छे यहूदा इस्करियोत चुनोन यहूदा इस्करियोतसे लिच्छा येशूदा चुड्सी म्हिगदेला यारी जिम्मा पिन्जी।

## येशूदेन म्हडला ग्ले बालजिबुल

मत्ती १२:२२-३२;

लूका ११:१४-२३; १२:१०

२० ओच्छे येशू दिमरी फेप्बा धुइरी दो:सी म्हिगदे हुप तजी। थेतबासेलमा येशूदेन थेला चेलागदेसे सोल छ्योइबारी सुत्तै आम्याड्नी। २१ चु ताम येशूला दिमला म्हिगदेसे थे:सी थेदा भोर्बारी भिसी दिमग्याम थोन्जी,

तिग्दा भिसम येशूला सेम ठेगानरी आरे भिसी थेनीगदेसे म्हन्मुबा।

२२ यरूशलेमग्याम खबा यहूदी धर्मगुरुगदेसे, “चुला ल्हुइरी म्हडगदेला ग्ले बालजिबुल मुला, चु म्हिसे मी म्हडगदेला ग्लेला शक्तिग्याम म्हड ताप्बा हिन्ना” भिसी भिजी।\*

२३ तर येशूसे थेनीगदेदा हाड मुबा ग्लारी ड्योइसी उखानग्याम चुहड् भिसी सुड्जी, “शैतानसे शैतानदा खाहड् लसी ताप्खम्ला? २४ यहुल्सा गिकलान म्हि हाड हाड न्हडरी आढिकसम थे यहुल्सा न्होड्ला। २५ ओच्छे दिम गिकला म्हिएनोन हाड हाड न्हडरी आढिकनी भिसम थे दिमनामएनोन फुप्ला। २६ थेहड् लसी शैतान शैतान न्हडरी आढिकनी भिसम थेला यहुल्सा नाश तला। २७ खालैसे भड्बा म्हिला दिमरी वाड्सी थेला धन सम्पत्ति यहो लतो:जी भिसम थेसे डाच्छा थे भड्बा म्हिदा चुड्सी खीतो:ला। थे भड्बा म्हिदा खीमाहेन्से जे थेसे थेला धन सम्पत्ति भोर्खम्ला।

२८ “एनीगदेसे डाला ताम ड्यान्गो, म्हिगदेसे लबा जम्मान पाप गेदेन परमेश्वरदा बिरोध लसी पाप लसैनोन माफ याड्ला। २९ तर जुन म्हिसे परमेश्वरला आत्माला बिरोध लसी पाप गेदेन पाप ताम लला, थेसे खाडमै माफ आयाड्। थे जुकजुकधोना पापरी चितो:ला।”\* ३० तिग्दा भिसम

थेनीगदेसे येशूला ल्हुइरी म्हड मुला भिसी भिबान मुबा।

### येशूला आमादेन आलेगदे

मत्ती १२:४६-५०; लूका ८:१६-२१

३१ ओच्छे येशूला आमादेन आलेगदे थेरी धोखजी। थेनीगदे मडग्यार राप्सी येशूदा ड्योइबारी कोइ म्हिदा पुड्जी। ३२ येशूला क्युनोन म्हिला हुल मुबा ओच्छे थेनीगदेसे येशूदा “मडग्यार हाडला आमादेन आलेगदे हाडदा म्हाइबान मुला” भिसी भिजी।

३३ येशूसे थेनीगदेदा “डाला आमादेन आलेगदे खाल हिन्ना?” भिसी सुड्जी। ३४ ओच्छे येशूसे हाडला क्युनोन चिबा म्हिगदेदा स्हीबान, “च्यागो, चुरी मुबा जम्मान डाला आमादेन आलेगदे हिन्ना। ३५ तिग्दा भिसम जुन म्हि परमेश्वरसे म्हन्बा अन्छार भ्रला थेनोन डाला आमा, डाला आडा ओच्छे डाला आले हिन्ना” भिसी सुड्जी।

### ब्लु द्वबाला उखान

मत्ती १३:१-२३; लूका ८:४-१५

४ येशूसे दो:सी समुन्द्रला कुनीरी फेप्सी लोप्बारी छ्याइजी। थेरी म्हिला हुल मुबासे लमा येशू समुन्द्ररी मुबा दांगा गिकरी धन्छ्यासी लोप्बारी छ्याइजी। ओच्छे म्हिला हुल चा समुन्द्रला कुनीरीक्यार चिजी।\* २ येशूसे थेरी मुबा म्हिगदेदा

उखानग्याम ल्हानान ताम लोप्वान चुहङ् सुङ्जी, <sup>३</sup>“च्यागो, ब्लु ढ्वबा म्हि गिक ब्लु ढ्वबारी भ्रजी। <sup>४</sup>थे म्हिसे ब्लु ढ्वबा धुङ्गी कोइ ब्लु ग्यामरी परब तजी, ओच्छे थे ब्लु चरा खसी चजी। <sup>५</sup>कोइ ब्लु चा युडबाला घहङ् मुबा सरी परब तजी, थेरी ल्हानान साप्रा आरेबासे लमा थे ब्लु योनान फुङ्जी। <sup>६</sup>थेतबासेलमा थेला टा नुप्ना निआम्याङ्नी। ओच्छे धिनीसे क्रोसी थे दोङ् सिजी। <sup>७</sup>कोइ ब्लु चा पुजु भाङ्गी परब तजी, ओच्छे थे ब्लु फुङ्गी ल्हेबान निजी। ल्हेसी निसै थे पुजु भाङ्गला हापसे लमा थे दोङ्गला नमरी गेडा आवाङ्नी। <sup>८</sup>कोइ ब्लु चा ज्यबा सरी परब तसी फुङ्गी, ओच्छे थे दोङ् ल्हेसी निमा थे दोङ्गला नमरी चा दोब्बर, तेब्बर, चौबरधोना गेडा रोजी। <sup>९</sup>जुन म्हिदा ड्यान्बा सेम मुला थेसे ड्यान्सी घोउ।”

<sup>१०</sup>म्हिला हुल निमाहेन्से येशूला क्युनोन मुबा म्हिगदेदेन च्युक न्ही चेलागदेसे थे उखानना अर्थ ड्योङ्जी। <sup>११</sup>ओच्छे येशूसे थेनीगदेदा चुहङ् भिसी सुङ्गी, “एनीगदेदा डाइ म्हिसे था आयाङ्बा परमेश्वरला य्हुल्साला ताम घोखम्बा ज्ञान बुद्धि पिन्बा मुला। तर स्थान्दोगदेदा चा डाइ उखानग्याम जे पाङ्बा मुला। <sup>१२</sup>तिगदा भिसम

‘थेनीगदेसे च्याबाम च्यामुला तर आम्राङ्मुला

ओच्छे ड्यान्बाम ड्यान्मुला तर आघोमुला।

आहिन्सम हाङ् हाङ्गला पाप ख्लासी परमेश्वरपट्टि दोःसेला मुबा,  
ओच्छे परमेश्वरसे थेनीगदेला पाप माफ लसेला मुबा।’ ”\*

### ब्लु ढ्वबा उखानना अर्थ

मत्ती १३:१८-२३; लूका ८:११-१५

<sup>१३</sup>येशूसे थेनीगदेदा “एनीगदेसे चु उखानला अर्थ आघोसम अर्गु उखानना अर्थ खाहङ् लसी घोला?” भिसी सुङ्गी। <sup>१४</sup>ब्लु ढ्वबा म्हि चा परमेश्वरला बचन थेःना लबा म्हि हिन्ना। <sup>१५</sup>ग्यामरीक्यार परब तबा ब्लुला अर्थ चा चुनोन हिन्ना, जुन म्हिसे परमेश्वरला बचन ड्यान्ना तर तुरुन्तन शैतान खसी थेनीगदेदा थेःना लबा ताम भोर्ला। <sup>१६</sup>युडबाला घहङ्गी परब तबा ब्लुला अर्थ चा चुनोन हिन्ना, जुन म्हिसे परमेश्वरला बचन थेःमैछ्याम ताङ्गी हाङ्गला सेमरी थान्ना, <sup>१७</sup>तर थेनीगदेला विश्वासला टा आरेबासे लमा, थे छिन्नङ् जे चिला। ओच्छे परमेश्वरला बचनदा विश्वास लबासे लमा थेनीगदेदा आपत विपत खमाहेन्से थेनीगदेसे विश्वास लबा खलाला। <sup>१८</sup>पुजु भाङ् न्हङ्गी परब तबा ब्लुला अर्थ चा जुन म्हिसे बचन ड्यान्ना <sup>१९</sup>तर थेला

सेमरी जम्बुलिडला धन्दा सुदादेन धन सम्पत्तिला लोभसे लमा परमेश्वरला बचनदा गे लआपुङ्, ओच्छे थेला विश्वासग्याम तिगै आरो २० तर ज्यबा सरी परब तबा ब्लुला अर्थ चा जुन म्हिसे बचन ड्यान्सी हाडला सेमरी थान्ना, थेला विश्वाससे दोब्बर, तेब्बर, चौबरधोना गे लला।

### नाडसलला अर्थ

लूका ८:१६-१८

२१ येशूसे थेनीगदेदा चुहङ् भिसी सुङ्जी, “खालैसे नाडसल प्रासी खाट धिरीनोन आथान ओच्छे फामसे घप्सीनोन आथान। बरु यहाल तगै भिसी नोबा ग्लारी थान्ना।\* २२ थेतबासेलमा ल्हुसैनोन आम्राङ्बा स्हे तिगै आरे। ओच्छे छुम्सी थान्सैनोन आघोबा स्हे तिगै आरे।\* २३ खालैदा ड्यान्बा सेम मुसम थेसे ड्यान्सी घोड।

२४ “एनीगदेसे जुन ताम थे:बा मुला, थे तामरी सेम लड। तिगदा भिसम जुन दप्बा स्हेसे एनीगदेसे दप्ला, थेनोन दप्बा स्हेग्यामसे एनीगदेसे याङ्ला। ओच्छे एनीगदेदा भन ल्हाना पिन्ना।\* २५ जुन म्हिसे डाइ लोप्बा तामदा सेम लसी ड्यान्ना, थेदा डाइ अभ घोना लला। तर डाइ लोप्बा ताम आड्यान्बादा चा थेसे

जुन घोबा मुला थे तामएनोन म्हाना लला।”\*

### ल्हेबान निबा ब्लुला उखान

२६ येशूसे चुहङ् भिसी सुङ्जी, “परमेश्वरला य्हुल्सा चा म्हि गिकसे बुरी ढ्वबा ब्लु हङ्बान हिन्ना। २७ ओच्छे थे म्हि म्हेसी चिसै आम्हेर्ना चिसै धिन म्हुननोन थे ब्लु फुइसी ल्हेबान निला, तर खाहङ् लसी ल्हेजी भिबा ताम थे म्हिसे था आयाङ्। २८ तिगदा भिसम बुरी ब्लु हाडनोन फुइसी ल्हेबान निमाहेन्से दोड दोला, ओच्छे थे दोडरी नम थोन्ना, जमाहेन्से थे नमरी गेडा वाङ्ला। २९ बाली दुइबा धुइ तमैछ्याम थे म्हि खसी बाली खन्ना।”\*

### पच्छै ब्लुला उखान

मती १३:३१-३२, ३४-३५;

लूका १३:१८-१९

३० येशूसे दो:सी चुहङ् भिसी सुङ्जी, “डाइ परमेश्वरला य्हुल्सादा तिगदेन छ्याम दाँजब लसे? ओच्छे एनीगदेदा खाहङ् लसी घोना लसे? ३१ चु मी घुज्यानरी ढ्वबा पच्छैला ब्लु हङ्बान हिन्ना। जम्बुलिडरी जम्मान भन्दा जजाबा ब्लु तसैनोन, ३२ थे गेडा ढ्वमाहेन्से ढापढुप न्हडरी जम्मान

४:२१ मती ५:१५; लूका ११:३३ ४:२२ मती १०:२६; लूका १२:२

४:२४ मती ७:२; लूका ६:३८ ४:२५ मती १३:१२; २५:२६; लूका १६:२६

४:२६ योए ३:१३

भन्दा हांगा मुबा घेन दोड तला। ओच्छे थे दोडला हांगारी चरागदे खसी जड स्होसी चिला।”

३३ थेनीगदेसे घोखन्तेधोना येशूसे चुहड्बान उखानगदेग्याम परमेश्वरला बचन लोप्जी। ३४ उखान आसुड्तेधोना थेनीगदेदा येशूसे तिगै ताम आलोप्नी। तर हाडला चेलागदे जे तबा धुइरी चा जम्मान उखानना अर्थ घोना लमुबा।

### येशूसे लाबालुडसरदा म्हाना लबा

मती ८:१८, २३-२७; लूका ८:२२-२५

३५ जमाकुनु ड्यसे येशूसे हाडला चेलागदेदा “लु, यहाड समुन्द्रला क्याम्सडपट्टि निइ” भिसी सुड्जी। ३६ येशूसे चुहड् सुड्माहेन्से चेलागदे म्हिला हुलदा ख्लासी येशू मुबा दोंगारी क्रे:जी। ओच्छे दोंगा चलब लबान क्याम्सडपट्टि भोर्जी। थेनीगदेला दोंगादेन छ्याम छ्याम अर्गु दोंगागदेएनोन निजी। ३७ निबान लमा समुन्द्ररी लाबालुडसर खजी। थे लाबालुडसरसे लमा समुन्द्रला छाल रे:सी दोंगा डुबब तबारी छ्याइजी। ३८ थे धुइरी येशू दोंगाला ग्यापपट्टि खुम लसी स्हिम्बान मुबा। ओच्छे चेलागदेसे “प्रभु, यहाड सिबारी छ्याइजी, हाडदा तिगै वास्ता आरे?” भिसी छिड्जी।

३६ जमाहेन्से येशूसे स्हेड्सी लाबालुडसरदेन समुन्द्रला छालदा

“कुटिसी चिउ” भिसी सुड्मैछ्याम लाबालुडसर म्हाजी ओच्छे शान्त तजी।

४० येशूसे “एनीगदे तिग्दा लोड्बा? दान्देधोना एनीगदेदा डाला विश्वास आरे?” भिसी हाडला चेलागदेदा सुड्जी।

४१ ओच्छे चेलागदे उदेक म्हन्सी लोड्बान, “चु खाल? लाबालुडसरदेन समुन्द्रला छालसेएनोन थेसे कुल्बा ताम ड्यान्बा चीम!” भिसी थेनीगदे हाड हाड न्हडरी ताम लबारी छ्याइजी।

### येशूसे म्हडसे स्याप्बा म्हिदा खम्ना लबा

मती ८:२८-३४; लूका ८:२६-३६

५ ओच्छे येशूदेन थेनीगदे गालील समुन्द्रला क्याम्सडपट्टि गेरासेनस भिबा ग्लारी धोखजी। २ येशू दोंगाग्याम फप्मैछ्याम म्हडसे स्याप्बा म्हि गिक धुर्साग्याम याबान खसी येशूदा स्याप्जी। ३ थे म्हि धुर्सारीक्यार चिमुबा। थेदा तिगै लसीन चुड्बारी आखम्मुबा थेदा च्याल्दासे खीसैनोन ब्लसी यार्मुबा। ४ तिग्दा भिसम थेदा ल्हानान रेम च्याल्दासे खीसी थान्सैनोन थेसे थे च्याल्दागदे फ्राटफ्रेट टाड्मुबा। थेतबासेलमा थेदा खालैसे तहरी थान्बारी आखम्मुबा। ५ थे धिन म्हुननोन हाडसे हाडदान युडबासे तोसी धुर्सा गडरीक्यार क्रिड्बान भ्रमुबा।

५:१ “गेरासेनस” भिबादा कोइ कोइ ग्रीक बाइबलरी गदरा भिसी भिबा मुला। गेरासेनस भिबादेन गदरा भिबा ग्ला गिकनोन हिन्ना।

६थेसे थारेङ्ग्यामसेन येशूदा  
 म्राङ्मैछ्याम यार्बान खसी येशूदा  
 फ्या लजी। ७ओच्छे थेसे “जम्मान  
 भन्दा घेन परमेश्वरला भा येशू,  
 हाडसे डादा तिग लबारी छ्याइबा?  
 डाइ हाडदा परमेश्वरला मिनरी घान  
 फासी भिला, डादा दुख थापिन्गो”  
 भिसी क्रिड्बान भिजी। ८तिगदा भिसम  
 येशूसे डाच्छान थे म्हेला लहुइरी मुबा  
 म्हडदा “ए थोन्सी निउ” भिसी सुड्बा  
 मुबा। ९ओच्छे येशूसे थेदा “एला मिन  
 तिग?” भिसी ड्योइमा, थे म्हडसे  
 “डाला मिन हुल हिन्ना, तिगदा भिसम  
 डनी ल्हानान मुला” भिसी भिजी। १०थे  
 म्हडसे येशूदा “डन्दा चु ग्लाग्याम  
 थाते:गो।” भिसी बिन्ती लजी।

११थेरी गडरीक्यार ढ्वला बथान  
 छबान मुबा। १२ओच्छे म्हडगदेसे  
 येशूदा “डन्दा ढ्वगदे न्हडरी  
 वाड्पुड्गो” भिसी बिन्ती लजी  
 १३येशूसे वाड्पुड्माहेन्से म्हडगदे  
 म्हेला लहुइग्याम थोन्सी ढ्वगदे  
 न्हडरी वाड्जी। वाड्मैछ्याम ओस्पन,  
 हजार न्ही ढ्वला बथान गड्ग्याम  
 समुन्द्ररी छ्योड्सी सिजी।

१४जमाहेन्से ढ्वा छबा म्हिगदे  
 यासी शहरदेन नाम्सा नाम्सारी निसी  
 चु ताम थे:ना लजी। ओच्छे जम्मान  
 म्हिगदे तिग तजीम भिसी च्याबारी  
 खजी। १५जमाहेन्से थेनीगदे येशू  
 मुबा ग्लारी खजी, ओच्छे थे म्हडला  
 हुलसे स्याप्बा म्हे खम्सी ज्यना लसी  
 क्वान क्वान्सी चिबा म्राड्सी थेनीगदे

लोड्जी। १६म्हडसे स्याप्बा म्हेदेन  
 ढ्वगदेदा तिग तिग तजी भिबा  
 ताम म्राड्बा म्हिगदेसे थेरी च्याबारी  
 खबा म्हिगदेदा पाड्जी। १७जमाहेन्से  
 थेनीगदेसे येशूदा “चु ग्लाग्याम फेप्पो”  
 भिसी बिन्ती लबारी छ्याइजी।

१८येशू दोंगारी क्रे:बारी छ्याइमा  
 थे म्हडसे स्याप्बा म्हेसे “डाएनोन  
 हाडदेन छ्याम निसे” भिसी बिन्ती  
 लजी। १९तर येशूसे हाडदेन छ्याम  
 खआपुड्ना “ए हाडला दिमरी  
 निसी एदा परमेश्वरसे उन्बा दयादेन  
 परमेश्वरसे एला लागिरी तिग तिग  
 लजी, थे तामगदे एसे हाडला होगदेदा  
 थे:ना लउ” भिसी सुड्जी। २०ओच्छे थे  
 निसी डेकापोलिस भिबा ग्ला नाडनोन  
 येशूसे हाडला लागिरी लबा उदेकला  
 गेला बारेरी पाड्सी भ्रजी, चु ताम  
 थे:सी नाम्साला म्हिगदे उदेक म्हन्जी।

### याइरसला भामेदेन का निबा बेथासे स्याप्बा म्रिड्महेमे खम्बा

मती ९:१८-२६; लूका ८:४०-५६

२१दो:सी येशू दोंगारी क्रे:सी  
 समुन्द्रला क्याम्सडपट्टि फेप्जी। ओच्छे  
 थेला क्युर्सिन म्हेला हुल पोप तजी।  
 २२थेनोन धुइरी यहूदीगदे हुप तबा  
 दिमला याइरस मिन लबा नेता गिक  
 थेरी धोखजी। थेसे येशूदा म्राङ्मैछ्याम  
 येशूदा फ्या लसी, २३“डाला भामे  
 आखम्ना सिबारी छ्याइबा मुला, हाड  
 फेप्वसी थेदा थुर्सी पिन्गो। ओच्छे थे  
 खम्मै” भिसी बिन्ती लजी।

२४ थेतबासेलमा येशू याइरसदेन छ्याम फेप्जी ओच्छे म्हिला हुलएनोन येशूला लिच्छा भ्रजी, म्हिला हुलसे लमा येशूदा तोर हुइ मार हुइ लजी। २५ थे म्हिला हुल न्हडरी का निबा बेथासे स्याप्सी च्युक न्ही दिड तबा म्रिडम्हेमे गिक मुबा। २६ थेसे हाडला मुदेबा धन सम्पत्ति खर्च लसी डाक्टरगदेदा च्यापुङ्गी। तर खम्ला भिमाम भन डाच्छाला भन्दा सारो तसी निजी। २७ थेसे येशूला बारेरी थे:माहेन्से थे म्हिला हुल न्हडरी वाङ्सी ग्यापग्याम खसी येशूला क्वान थुर्जी। २८ तिगदा भिसम थेसे “डाइ येशूला क्वान थुर्बारी जे म्याड्सम डा खम्ला” भिसी म्हन्बा मुबा। २९ थेसे येशूला क्वान थुर्मेछ्याम थेला का निबा बेथा म्हाजी भिसी थेसे तुरुन्तन था याङ्गी। ३० ओच्छे येशूसे हाडला लहुइग्याम तुरुन्तन शक्ति थोन्बा था याङ्सी म्हिला हुलपट्टि दो:सी, “खाल्से डाला क्वान थुर्जी?” भिसी ड्योइजी।

३१ चेलागदेसे येशूदा भिजी, “चुदेला म्हिला हुलसे तोर हुइ मार हुइ लबा स्हीना स्हीनान दो:सी हाड ‘डादा खाल्से थुर्जी’ भिसी सुड्बान मुला।” ३२ डादा थुर्बा खाल भिसी येशूसे क्युर्सीन च्याबारी छ्याइजी। ३३ ओच्छे थे का निबा बेथासे स्याप्बा म्रिडम्हेमेसे येशूला क्वान थुर्मा हाडदा तिग तजी भिबा था तसी लोङ्सी फितफित धर्बान येशूला डाच्छापट्टि फ्या लजी। ओच्छे येशूदा जम्मान सत्य ताम पाङ्गी। ३४ येशूसे

थेदा “भामे, एला विश्वाससे लमा ए खम्बा मुला। दाहेन्से ए ढुक्क तसी निउ, एला रोग म्हाजी” भिसी सुङ्गी।

३५ येशूसे ताम लबान लबा धुइरी याइरसला दिमग्याम म्हिगदे खसी, “हाडला भामे सिजी, दाहेन्से गुरुदा दुख थापिन्गो” भिसी भिजी।

३६ तर येशूसे थेनीगदेला तामदा थेगो आलना, याइरसदा “थालोङ्गो, एसे विश्वास जे लउ” भिसी सुङ्गी। ३७ ओच्छे येशूसे पत्रुस, याकूबदेन याकूबला आले यूहन्नादा बाहेक स्थान्दोदा हाडदेन छ्याम खआपुङ्नी। ३८ थेनीगदे याइरसला दिमरी फेप्खमा येशूसे थेरी मुबा म्हिगदे क्राबा क्रिड्बादेन हल्ली खल्ली लसी चिबा म्राङ्गी। ३९ येशू दिम न्हडरी वाङ्सी, थेनीगदेदा “तिगदा एनीगदे चुहङ् लसी क्राबा क्रिड्बादेन हल्ली खल्ली लसी चिबा? माइ सिबा आरे, म्हेर्सी चिबा मुला” भिसी सुङ्गी।

४० तर थेनीगदेसे येशूला तामदा खिसी लसी डे:जी। ओच्छे येशूसे थेनीगदे जम्मादान मडग्यार ते:सी माइला आबादेन आमा ओच्छे हाडला चेलागदेदा छ्याम भोर्सी माइ मुबा ग्लारी फेप्जी। ४१ ओच्छे येशूसे थे माइला या चुङ्गी, “तालिता कुम,” भिसी सुङ्गी। चु भिबा चा “माइ रे:गो” भिबा हिन्ना। ४२ येशूसे चुहङ् सुड्मैछ्याम थे माइ डोड रे:सी क्यारमार भ्रबारी छ्याइजी। थे माइ च्युक न्ही दिडला मुबा। चु म्राङ्सी थेनीगदे उदेक म्हन्जी। ४३ येशूसे



थेनीगदेदा “च्यागो, चु ताम खालैसे था थायाङ्गै।” ओच्छे थे माइदा चा “तिगै चबा स्हे पिन्गो” भिसी सुङ्गी।

### नासरतरी येशूदा पत्याब आतबा

मती १३:५३-५८; लूका ४:१६-३०

६ येशू थे ग्याम थोन्सी हाडलान नाम्सारी फेप्जी। ओच्छे थेला चेलागदेएनोन थेदेन छ्याम निजी। २ब्लप्बा न्हबा धिनकुनु येशूसे यहूदीगदे हुप तबा दिमरी लोप्बारी छ्याइजी। थेसे लोप्बा म्राङ्सी ल्हानान म्हिगदे उदेक तजी, “चु म्हिसे चु जम्मान खानडग्याम याङ्गी? चुदा पिन्बा चु ज्ञान बुद्धि खाहड्बा हिन्ना? चुला याग्यामसे खाहड्बा उदेकला गे तबा? ३तिग चु मरियमला भा, याकूब, योसेफ, यहूदादेन सिमोनला ज्योज्यो सिकर्मी आहिन? तिग चुला आडागदेएनोन यहाडदेन छ्याम आरे?” भिसी येशूला ताम पत्याब आतनी।

४येशूसे थेनीगदेदा “अगमवक्तादा जम्मान ग्लारी मान लला, तर हाडला नाम्सारीदेन हाडला म्हिगदे ओच्छे हाडला दिमरी बाहेक अर्गु खजिबै ग्लारी निसैनोन मान लला” भिसी सुङ्गी।\* ५थेरी येशूसे कोइ कोइ आखम्बा म्हिगदेशेरी हाडला या थान्सी थेनीगदेदा खम्ना लजी। तर थेनीगदेला विश्वास आरेबा म्राङ्सी

अर्गु उदेकला गे आलनी। ६येशू थेनीगदेसे विश्वास आलबा म्राङ्सी उदेक म्हन्जी। थेतबासेलमा नाम्सा नाम्सारी लोप्बारी फेप्जी।

### येशूसे हाडला च्युक न्ही चेलागदेदा पुइबा

मती १०:१, ५-१५; लूका ९:१-६

७थे धुइरी येशूसे हाडला च्युक न्ही चेलागदेदा ड्योइसी थेनीगदेदा म्हड ताप्बा अधिकार पिन्सी गोर न्ही न्ही लसी पुइजी। ८येशूसे थेनीगदेदा चुहड् भिसी कुल्जी, “एनीगदेसे ग्यामला लागिरी कडी बाहेक तिगै चबा स्हे, टाडगा, भोला थापुइगो। ९तर लखम क्वान्गो, ओच्छे हाडला लागिरी पोबा क्वान थापुइगो। १०दोःसी येशूसे थेनीगदेदा चुहड् भिसी सुङ्गी, “एनीगदे खजिबै दिमरी वाड्माहेन्से थे नाम्साग्याम थोन्सी आनितेथोना एनीगदे थेदिमरीन चिउ। ११चुदे खजिबै ग्लारी एनीगदेदा मान आलनी। ओच्छे एनीगदेसे पाङ्बा ताम आङ्यान्नी भिसम, एनीगदे थे ग्लाग्याम थोन्बा धुइरी दाहेन्से डन्से लतोःबा गे लसी जिन्जी। एनीगदेसे तिग लतोःबा लउ भिसी काडला धुलु खर्सी पिन्गो।”\*

१२जमाहेन्से थेला चेलागदे थेग्याम थोन्सी निसी म्हिगदेदा “हाड हाडला पाप रूलासी परमेश्वरपट्टि दोःगो” भिसी पाङ्गी। १३थेनीगदेसे ल्हानान

म्हिला ल्हुङ्ग्याम म्हड ताप्जी। ओच्छे ल्हानान आखम्बा म्हिगदेदा छ्युगु फोर्सी प्रार्थना लसी खम्ना लजी।\*

### बप्तिस्मा पिन्बा यूहन्ना सिबा

मत्ती १४:१-१२; लूका ९:७-९

१४ येशूसे लबा उदेकला गेला बारेरी हेरोद ग्लेसे थे:जी, तिगदा भिसम जम्मान ग्लारी येशूला मिन थे:मुबा। गाते म्हिसे मी “बप्तिस्मा पिन्बा यूहन्ना सिबाग्याम सोसी खजीम, थेतबासेलमान थेसे चुहड्बा उदेकला गेगदे लबा हिन्ना” भिसी भिमुबा। १५ तर स्थहान्दोगदेसे, “चु एलिया हिन्ना” भिसी भिजी। ओच्छे अभ स्थहान्दोगदेसे, “चु म्हि मी ओन्माला अगमवक्तागदे हड्बान अगमवक्ता गिक हिन्ना” भिसी भिजी।\*

१६ तर हेरोदसे चु ताम थे:सी, “चु म्हि डाइ साइपुड्बा यूहन्ना हिन्ना, थेनोन सिबाग्यामसे सोसी खजीम” भिसी भिजी। १७ तिगदा भिसम डाच्छा हेरोद हाडसेन यूहन्नादा चुड्पुड्जी थेदा भयाल्खानरी थान्बा मुबा। हेरोदसे हाडला आले फिलिपला मिड हेरोदियासदेन छ्याम ब्याह लबासे लमा थेसे यूहन्नादा भयाल्खानरी थान्बा मुबा। १८ तिगदा भिसम यूहन्नासे हेरोददा “हाडसे आले चाडदेन छ्याम ब्याह लबा ठीक आहिन”

भिसी भिमुबा।\* १९ थेतबासेलमा हेरोदियाससे यूहन्नाथोरी ईख थान्सी थेदा साइबारी म्हाइमुबा तर खम्बा आरेबा। २० तिगदा भिसम यूहन्ना परमेश्वरसे म्हन्बा अन्धार भ्रबा म्हिदेन परमेश्वरला लागिरी फेसी थान्बा म्हि भिसी हेरोददा था मुबा। थेतबासेलमा यूहन्नादेन छ्याम लोड्सी थेदा जोगब लसी थान्मुबा। यूहन्नासे लोण्बा प्राड्सी थेला सेम क्रामुबा। तसैनोन सेम लसी ड्यान्मुबा।

२१ हेरोदियाससे हेरोद न्हबा धिनदा ढन्सी लबा भोजकुनु ज्यबा मौका याड्जी। हेरोदसे हाड न्हबा धिनदा ढन्सी घेनपदरी मुबा म्हिगदे, सिपाहीला कप्तानगदेदेन गालील नाम्साला गन्बा म्हिगदेदा ड्योइसी भोज पिन्जी। २२ थे धुइरी हेरोदियासला हाडलान भामे थेरी खसी स्थहजी। थे स्थहबा प्राड्सी हेरोद ग्लेदेन थेला डोन्बोगदे ल्हानान ताड्जी। हेरोद ग्लेसे थे माइदा “एदा तिग तो:बा डादा हीगो, थे डाइ एदा पिन्ना” भिसी भिजी। २३ ओच्छे हेरोद ग्लेसे घान फासी, “एदा डाला गडसल य्हुल्सा भिसै पिन्ना” भिसी भिजी।

२४ ओच्छे थे मडग्यार थोन्सी हाडला आमादा डाइ तिग हीगो भिसी, ड्योइमा, “बप्तिस्मा पिन्बा यूहन्नाला थोबो हीगो” भिसी थेला आमासे भिजी। २५ चुहड् भिमैछ्याम थे माइ

गले मुबा ग्लारी निसी, “दान्दे डादा हाडसे बप्तिस्मा पिन्बा यूहन्नाला थोबो खार्बारी भउ” भिसी भिजी। २६थेहड् भिमाहेन्से गलेला सेमरी दुख ड्हम्जी, तर ओतेला डोन्बोला ओन्छाडरी घान फासी पाड्बा तामदा थाबारी आखम्नी। २७थेतबासेलमा थेसे तुरुन्तन हाडला सिपाही गिकदा “बप्तिस्मा पिन्बा यूहन्नाला थोबो थासी भउ” भिसी कुल्जी। ओच्छे थे सिपाही भयाल्खानरी निसी यूहन्नाला थोबो थाजी। २८थासी भसी थे माइदा खार्बारी युसी पिन्जी। ओच्छे थे माइसे थेला आमादा पिन्जी। २९चु ताम थे:सी यूहन्नाला चेलागदे खसी थेला लास भोर्सी धुर्सारी थान्जी।

### येशूसे हजार डा म्हिगदेदा चबा स्हे पिन्बा

मती १४:१३-२१; लूका ९:१०-१७;

यूहन्ना ६:१-१३

३०येशूसे पुड्बा जम्मान मुल चेलागदे दो:सी खसी येशू मुबा ग्लारी पोप तजी। थेनीगदेसे लबा गेदेन लोप्सी पिन्बा तामगदे येशूदा पाड्जी। ३१येशूसे थेनीगदेदा “एनीगदेएनोन सुनसान ग्लारी खसी ब्लपबा न्हउ” भिसी सुड्जी। तिगदा भिसम थेरी खबा निबा म्हिगदे ल्हानान मुबासे लमा थेनीगदेदा चबारी सुतै फुसत आरेबा। ३२थेतबासेलमा थेनीगदे दोंगारी क्रे:सी

सुटुक्क सुनसान ग्लारी फेप्जी। ३३तर ल्हानान म्हिगदेसे थेनीगदे निबान लबा म्नाड्जी। थेतबासेलमा थेनीगदे फेप्गे लबा ग्ला था याड्सी, नाम्सा नाम्साला म्हिगदे यार्बान थेनीगदे फेप्बा ग्लापट्टि निजी। ओच्छे थेनीगदे भन्दा डाच्छा धोजी। ३४येशू दोंगार्याम फाप्बा धुइरी ल्हानान म्हेला हुल म्नाड्सी थेदा दया रे:जी। तिगदा भिसम थे म्हिगदे गोठालो आरेबा ग्युगदे हड्बा मुबा। येशूसे थे म्हिगदेदा ल्हानान ताम लोप्बारी छ्याइजी।\*

३५ड्यसे तमाहेन्से थेला चेलागदे थे मुबा ग्लारी खसी थेदा “दाहेन्से ड्यसे तसी जिन्जी, चु सुनसान ग्लारी तिगै आरे। ३६थेतबासेलमा चु म्हिगदेदा पुड्गो। थेनीगदे चु क्यारमारला नाम्सारी निसी चबा स्हेगदे ग्लुसी चगै” भिसी भिजी। ३७तर येशूसे थेनीगदेदा “एनीगदेसेन चुगदेदा चबा स्हे पिन्गो” भिसी सुड्जी। तर थेनीगदेसे येशूदा “डन्से ग्यार्जा न्ही म्हुइला डबलसे गेड ग्लुसी थेनीगदेदा चबारी छ्योला?” भिसी भिजी।

३८येशूसे थेनीगदेदा “एनीगदेदेन छ्याम गेड गाते मुला? निसी च्यागो” भिसी सुड्जी। जमाहेन्से थेनीगदेसे च्यासी, “गोर डा गेडदेन गोर न्ही तार्डा मुला” भिसी भिजी।

३९जमाहेन्से येशूसे म्हिगदेदा पाडरी लाम लसी चिउ भिसी कुल्जी।

४० ओच्छे म्हिगदे ग्यार्जा ग्यार्जदिन बोगल न्हीसे च्युइ च्युइला लाम लसी पाडरी चिजी। ४१ येशूसे थे गोर डा गेडदेन गोर न्ही तार्डा थोसी स्वर्गपट्टि स्हीसी परमेश्वरदा धन्यवाद पिन्जी। ओच्छे थे गोर डा गेड क्युइसी म्हिगदेदा भो लसी पिन्गो भिसी चेलागदेदा पिन्जी। ओच्छे गोर न्ही तार्डाएनोन जम्मान म्हिगदेदा भो लसी पिन्जी। ४२ ओच्छे जम्मान म्हिगदेसे ग्रेन्ना चजी। ४३ जमाहेन्से चेलागदेसे लेड्बा गेडदेन तार्डा दुइमा च्युक न्ही सोली तजी। ४४ थेरी चबा हेम्फेबेगदे हजार डा मुबा।

### येशू समुन्द्रथोरी भ्रवा

मती १४:२२-३६; यूहन्ना ६:१५-२१

४५ ओच्छे येशूसे तुरुन्तन हाडला चेलागदेदा दोंगारी क्रै:सी क्यामसड बेथसेदा नाम्सारी हाड भन्दा डाच्छा पुइजी। थे धुइरी येशूसे चा म्हिला हुलदा पुइबान लजी। ४६ ओच्छे थेनीगदेदा पुइमाहेन्से येशू गडपट्टि प्रार्थना लबारी फेप्जी। ४७ ड्यसे तमा दोंगा समुन्द्रला गुडरी मुबा, ओच्छे येशू चा गिकजेन समुन्द्रला कुनीरी मुबा। ४८ थेसे चेलागदेदा दोंगा चलब लबारी गाहो तबा म्राड्जी। तिगदा भिसम लाबा उल्टोग्यामसे खबा मुबा। स्थहोला तीन बजेरीक्यार येशू समुन्द्रथोरी भ्रवान थेनीगदेपट्टि फेप्खजी, ओच्छे थेनीगदेदा ख्लासी डाच्छा फेप्गे लमा, ४९ थेनीगदेसे येशूदा समुन्द्रथोरी भ्रवान लबा

म्राड्सी म्हड मुनम भिसी थेनीगदे लोड्सी क्रिड्जी। ५० तिगदा भिसम येशूदा म्राड्सी जम्मान लोड्बा मुबा। तर तुरुन्तन येशूसे थेनीगदेदा “भड लउ, डानोन हिन्ना, थालोड्गो” भिसी सुड्जी। ५१ ओच्छे हाडला चेलागदेदेन छ्याम दोंगारी क्रै:जी। जमाहेन्से लाबालुडसर म्हाजी। ओच्छे थेनीगदे ल्हानान उदेक तजी। ५२ तिगदा भिसम थेनीगदेला सेम कोड्बासे लमा येशूसे हजार डा म्हिगदेदा गेड पिन्बा म्राड्सीएनोन थेला अर्थ घोबा आरेबा। ५३ थेनीगदे समुन्द्र थासी गनेसरेत

भिबा ग्लारी धोखमाहेन्से दोंगा समुन्द्रला कुनीरी थान्सी, ५४ दोंगाग्याम फाम्पेछ्याम म्हिगदेसे येशूदा डोसेजी। ५५ ओच्छे थेनीगदे क्यारमारला नाम्सारी निसी येशू फेप्खजी भिसी थे:ना लजी। जमाहेन्से म्हिगदेसे आखम्बा म्हिगदेदा तीबा नान्बादेन छ्यामनोन येशू मुबा ग्लारी भबारी छ्याइजी। ५६ जुन जुन ग्लारी येशू फेप्जी, थे ग्लारी म्हिगदेसे आखम्बा म्हिगदेदा येशूला क्वान जे भिसै, थुपुड्गो भिसी बिन्ती लजी। ओच्छे येशूला क्वान थुर्बा जति जम्मान खम्जी।

### रिमठिमला बारेरी लोण्वा ताम

मती १५:१-२०

७ यरूशलेमग्याम खबा फरिसीदेन यहूदी धर्मगुरुगदे येशूला क्युर्नोन पोप तजी। २ थेनीगदेसे येशूला कोइ

कोइ चेलागदेसे या आखुना चबा  
प्राड्जी। <sup>३</sup>फरिसीगदेदेन यहूदीगदेला  
आखे म्हेमेला रिमठिम अन्छार या  
आखुतेधोना चबारी आतबा मुबा। <sup>४</sup>चुदे  
जे आहिन बजारग्याम खमाहेन्से नुहाब  
आलतेधोना आचमुबा। आखे म्हेमेला  
चु भन्दा ल्हानान रिमठिम तेन्मुबा  
ओच्छे खोरिगदे, ताडगदेदेन काँसला  
ताडगदे म्याप्वा रिमठिम मुबा।

<sup>५</sup>ओच्छे फरिसीगदेदेन यहूदी  
धर्मगुरुसे येशूदा “हाडला चेलागदे  
तिगदा आखे म्हेमेला रिमठिम अन्छार  
आभ्रबा? ओच्छे या आखुनान चबा?”  
भिसी ड्योइजी।

<sup>६</sup>थेतबासेलमा थेनीगदेदा  
चुहड् भिसी सुड्जी, “एनीगदे  
हड्बा कण्टी म्हिगदेला लागिरी  
यशैया अगमवक्तासे भिबा ताम  
ढिक्वा मुला,

“चु म्हिगदेसे सुडसे जे डादा मान  
लमुला,  
तर सेमहेन्से चा मान  
आलमुला।

<sup>७</sup>ओच्छे एनीगदेसे डादा तेन्बाम  
तेन्मुला  
तसैनोन परमेश्वरसे कुल्बा  
तामदा भन्दा म्हिसे स्होबा  
रिमठिमदा घेन म्हन्मुला।”\*

<sup>८</sup>एनीगदेसे परमेश्वरसे कुल्बा ताम  
ख्लासी म्हिगदेला रिमठिम तेन्बा  
मुला।”

<sup>९</sup>दोःसी येशूसे थेनीगदेदा चुहड्  
भिसी सुड्जी, “एनीगदे हाडला  
रिमठिम तेन्बाला लागिरी परमेश्वरसे  
कुल्बा ताम ख्लाबा एनीगदे खाहड्बा  
छट्टु? <sup>१०</sup>तिगदा भिसम मोशासे भिबा  
मुला, ‘एसे हाडला आबा आमादा मान  
लउ,’ ओच्छे ‘जुन म्हिसे हाडला आबा  
आमादा बिरोध लसी नइबा ताम लला  
थेदा चा साइनोन तोःला’ भिसी सुड्बा  
मुला। <sup>\*</sup> <sup>११</sup>तर एनीगदेसे चा ‘जुन म्हिसे  
हाडला आबा आमादा पिन्तोःबा स्हे  
परमेश्वरदा फुल्बा मुला, थेसे हाडला  
आबा आमादा मान लआतोः’ भिसी  
पाड्मुला। <sup>१२</sup>थेतबासेलमा एनीगदेला  
तामग्यामसेन म्हिगदेदा थेन्ना आबा  
आमादा तिगै पिनआपुड्बा हड्बान  
हिन्ना। <sup>१३</sup>चुहड् लसी एनीगदे  
हाडला रिमठिम अन्छार चा भ्रमुला।  
तर परमेश्वरला बचनदा चा तिगै गे  
आखेल्बा भिसी म्हन्मुला। चुहड्बा गे  
एनीगदेसे ल्हानान लमुला।”

### म्हिदा चोखो तना लबा स्हेगदे

मत्ती १५:१०-२०

<sup>१४</sup>दोःसी येशूसे म्हिला हुलदा हाड  
मुबा ग्लारी ड्योइसी चुहड् भिसी  
सुड्जी, “डाइ पाड्बा ताम तिग चीम  
भिसी एनीगदेसे घोबारी म्हाइगो।  
<sup>१५</sup>खजिबै चबा स्हेसे म्हिदा न्होड्ना  
लबारी आखम। तर म्हिला सेमग्याम  
थोन्बा तामसे जे म्हिदा न्होड्ना

लमुला। १६जुन म्हिदा ड्यान्बा सेम मुला थेसे ड्यान्सी घोड।”†

१७येशू म्हिगदेदा रूलासी दिम न्हडरी वाड्माहेन्से थेला चेलागदेसे “हाडसे सुड्बा ताम डन्दा घोना लसी पिन्गो” भिसी भिजी। १८जमाहेन्से येशूसे हाडला चेलागदेदा चुहड् भिसी सुड्जी, “दान्देधोना अफ एनीगदेसे घोबा आरे? एनीगदेदा था आरे? म्हिला सुड्ग्याम न्हडरी वाड्बा स्हेसे म्हिदा न्होड्ना आल। १९तिग्दा भिसम चबा स्हे मी सेम न्हडरी आवाड्ना फो न्हडरी वाड्ला ओच्छे फो न्हडसेनोन मड्ग्यार थोन्ना।” चुहड् लसी येशूसे जम्मान चबा स्हे चबारी तला भिसी हाडला चेलागदेदा घोना लसी पिन्जी।

२०येशूसे दोःसी चुहड् भिसी सुड्जी, “म्हिला सेम न्हड्ग्याम मड्ग्यार थोन्बा तामसे म्हिदा न्होड्ना लमुला। २१तिग्दा भिसम म्हिला सेमग्यामसेन नड्बा म्हन्बा, ब्रेल्सी भ्रबा, य्हो लबा, म्हि साड्बा, २२म्हिला मिड्देन छ्याम ब्रेल्सी भ्रबा, लोभ लबा, नड्बा गे लबा, ठगब लबा, सुडरी जे ताम खजी थेनोन पाड्सी भ्रबा, डाह लबा, म्हिला तामगन लबा, डा हड्बा खालै आरे भिसी भ्रबा, मूर्ख गे लबा चु जम्मान तामगदे थोन्मुला। २३म्हिला सेमग्याम थोन्बा चु जम्मान नड्बा तामसेन म्हिगदेदा न्होड्ना लमुला।”

## अर्गु यहुलला मिड्म्हेमेला विश्वास

मती १५:२१-२८

२४जमाहेन्से येशू थेग्याम टुरोस भिबा ग्लापट्टि फेप्जी। ओच्छे खालैसे था थायाड्गै भिसी दिम गिकरी वाड्जी तसैनोन म्हिगदेसे था याड्जी।† २५थेनोन धुडरी मिड्म्हेमे गिकसे येशूला बारेरी थेःमैछ्याम येशू मुबा ग्लारी खसी येशूदा फ्या लजी। थे मिड्म्हेमेला भामेदा म्हडसे स्याप्बा मुबा। २६थे मिड्म्हेमे सिरिया यहुल्साला फोनिके भिबा नाम्सारी न्हबा मुबा। थे अर्गु यहुलला मिड्म्हेमे मुबा। थेसे “डाला भामेला लहुड्ग्यामसे म्हड ताप्सी पिन्गो” भिसी येशूदा बिन्ती लजी। २७तर येशूसे “डाच्छा हाडला कोलागदेदा भ्रेन्ना लतोःला, हाडला कोलागदेला गेड ब्यन्सी नगीदा पिन्बा ठीक आहिन” भिसी सुड्जी। २८ओच्छे थे मिड्म्हेमेसे “हिन्ना प्रभु, तसैनोन कोलागदेसे चबान लमा ताड्बा भ्राड्भ्रुड् नगीसेनोन चम्याड्मुला” भिसी भिजी। २९येशूसे थे मिड्म्हेमेदा “एसे चुहड् भिबासे लमा एला भामेला लहुड्ग्याम म्हड थोन्सी निसी जिन्बा मुला। दाहेन्से ए दिमरी निउ” भिसी सुड्जी। ३०थे मिड्म्हेमे दिमरी धोमा भामेला लहुड्ग्याम म्हड थोन्सी निसी जिन्बा मुबा, ओच्छे भामे चा खाटरी म्हेसी चिबा मुबा।

७:१६ चु पदला ताम चा ल्हानान हड्बा ग्रीक बाइबलरी भिबा आरे।

७:२४ कोड कोड ग्रीक बाइबलरी “टुरोसदेन सीदोन” भिसी भिबा मुला।

## नाब्यड आथे:बा खागले म्हि खम्बा

३१ येशू टुरोस भिबा ग्लाग्याम थोन्सी सीदोन ओच्छे डेकापोलिस तबान गालील समुन्द्ररी फेज्जी। ३२ थेरी म्हिगदेसे नाब्यड आथे:बा खागले म्हिदा येशू मुबा ग्लारी भसी, “थेदा थुर्सी खम्ना लपिन्गो” भिसी बिन्ती लजी। ३३ येशूसे थे म्हिदा म्हिला हुलग्याम जजाकी क्याथाड भोर्सी थेला नाब्यड न्हीरी या जुम्बी फाड्जी। ओच्छे सरी थो स्वासी यासे थेला लेरी थुर्जी। ३४ जमाहेन्से येशूसे स्वर्गपट्टि स्हीबान सा न्हसी, “इफफाता” भिसी सुड्जी। चु भिबा चा “ठोड्गो” भिबा हिन्ना। ३५ चुहड् भिमैछ्याम थे म्हिला नाब्यड थे:जी ओच्छे थेसे ज्यना लसी ताम पाड्बारी छ्याइजी। ३६ येशूसे थेनीगदे जम्मादान “चु ताम खालैदा थापाड्गो” भिसी कुल्जी। तर जति जति चु ताम खालैदा थापाड्गो भिसी कुल्जी, फन ओतेन म्हिगदेसे पाड्बान भ्रजी। ३७ चु ताम थे:बागदेसे उदेक म्हन्सी, “येशूसे लबा जम्मान गे ज्यबा मुला। थेसे नाब्यड आथे:बा खागले म्हिदाएनोन खम्ना लमुला” भिसी भिबारी छ्याइजी।

## येशूसे हजार बिलि म्हिदा चबा स्हे पिन्बा

मत्ती १४:३२-३६

८ तिमै धिन लिच्छा दो:सी म्हिला हुल पोप तजी। थेनीगदेदेन छ्याम चबा स्हे तिमै आरेबासे लमा

येशूसे हाडला चेलागदेदा ड्योइसी, २ “चु म्हिगदेदा म्राड्सी डादा दया रे:जी। तिगदा भिसम चुगदे डादेन छ्याम भ्रबा तिनी सोमरे तजी। ओच्छे चुगदेदेन छ्याम चबा स्हे तिमै आरे। ३ चु म्हिगदेदा फोइथाननोन दिमरी पुइजी भिसम ग्यामरी बिहोस तला। तिगदा भिसम कोइ कोइ म्हिगदे ल्हानान थारेड्ग्याम खबा मुला” भिसी सुड्जी।

४ जमाहेन्से चेलागदेसे येशूदा “चुहड्बा तिमै आयाड्बा ग्लारी चु म्हिगदेदा खानड्ग्याम गेड भसी ख्वासे?” भिसी भिजी। ५ येशूसे थेनीगदेदा “एनीगदेदेन छ्याम गेड गाते मुला?” भिसी ड्योइमा, थेनीगदेसे “डन्देन छ्याम गोर निस गेड मुला” भिसी भिजी।

६ जमाहेन्से येशूसे थेरी मुबा म्हिला हुलदा पाडरी चिपुड्जी। ओच्छे थेसे गोर निस गेड थोसी परमेश्वरदा धन्यवाद पिन्सी गेड क्युइसी चेलागदेदा भो लसी पिन्गो भिसी सुड्जी, ओच्छे चेलागदेसे म्हिगदेदा भो लसी पिन्जी। ७ थेनीगदेदेन छ्याम जजाबा तार्डागदेएनोन मुबा। येशूसे तार्डाला लागिरीनोन धन्यवाद पिन्सी चेलागदेदा भो लपुड्जी। ८ ओच्छे म्हिगदेसे प्रेन्ना चजी। जमाहेन्से चेलागदेसे लेड्बा गेडदेन तार्डा दुइमा सोली निस तजी। ९ थेरी गेड चबा म्हिगदे हजार बिलि ते मुबा। येशूसे म्हिला हुलदा पुइसी, १० हाडला

चेलागदेदेन छ्याम दाँगारी क्रेःसी दलमनुथा भिबा ग्लारीक्यार फेप्जी।

### फरिसीगदेसे उदेकला चिनु म्हाइबा

मत्ती १६:१-४

११ फरिसीगदे येशू मुबा ग्लारी खसी चुहङ् भिसी ताम लबारी छ्याइजी। ओच्छे येशूला सेम च्याबान, “डन्दा स्वर्गला चिनु गिक उन्गो” भिसी भिजी।\* १२ चु ताम थेःसी येशूसे सा न्हसी, “एनीगदेसे डाला ताम ड्यान्गो, दान्देला म्हिगदेसे तिग्दा चिनु म्हाइबा? तर डाइ दान्देला म्हिगदेदा तिगै चिनु आउन” भिसी सुङ्जी।\* १३ ओच्छे थेनीगदेदा रूलासी दाँगारी क्रेःसी येशू क्याम्सडपट्टि फेप्जी।

### येशूसे फरिसीदेन हेरोदसे लबा लुसीला तामला बारेरी लोण्वा

मत्ती १६:५-१२

१४ दाँगारी क्रेःसी समुन्द्रला क्यामसडपट्टि निबा धुइरी चेलागदेसे गेड भोर्बारी म्लेःबा मुबा। थेनीगदेदेन छ्याम गेड गिक जे मुबा। १५ ओच्छे येशूसे थेनीगदेदा “च्यागो, एनीगदे फरिसीदेन हेरोद ग्लेला खमीरग्याम होशियार तसी चिउ” भिसी सुङ्जी।\* १६ तर चेलागदेसे चा “ग्हाडदेन छ्याम गेड आरेबासे लमा येशूसे चुहङ् भिसी सुङ्बा हिन्ना” भिसी

हाड हाड न्हडरी ताम लबारी छ्याइजी।

१७ चेलागदेसे चुहङ् लसी ताम लबा था याङ्सी येशूसे थेनीगदेदा चुहङ् भिसी सुङ्जी, “एनीगदे गेड आरे भिसी तिग्दा ताम लसी चिबा? एनीगदेसे अफ घोबा आरे? एनीगदेला सेम कोड्बान मुला? १८ मी मुसैनोन एनीगदेसे तिग्दा आम्राङ्बा? नाब्यड मुसैनोन तिग्दा आथेःबा? अफ एनीगदेसे ढन्बा आरे?” १९ डाइ गोर डा गेडसे हजार डा म्हिगदेदा रूवामा एनीगदेसे लेङ्बा गेड गाते सोली दुइबा मुबा?” थेनीगदेसे “च्युक न्ही सोली” भिसी भिजी। २० ओच्छे “डाइ गोर निस गेडसे हजार ब्लि म्हिगदेदा रूवामा एनीगदेसे लेङ्बा गेड गाते सोली दुइमुबा?” भिसी येशूसे ड्योइमा, थेनीगदेसे “सोली निस” भिसी भिजी। २१ जमाहेन्से येशूसे थेनीगदेदा “थेहङ् भिसम अफ एनीगदेसे तिग्दा आघोबा?” भिसी सुङ्जी।

### येशूसे मी आम्राङ्बा म्हिला मी प्राङ्ना लबा

२२ येशू हाडला चेलागदेदेन छ्याम बेथसेदा भिबा ग्लारी धोखमा म्हिगदेसे मी आम्राङ्बा म्हि गिकदा येशू मुबा ग्लारी भसी, “चुदा थुर्सी पिन्गो” भिसी बिन्ती लजी। २३ येशूसे

८:११ मत्ती १२:३८; लूका ११:१६ ८:१२ मत्ती १२:२६; लूका ११:२६

८:१५ लूका १२:१ ८:१८ यर्मि ५:२१; इज १२:२; मर्क ४:१२



थे मी आम्राड्बा म्हिदा नाम्साग्याम क्याथाड भोर्सी थे मी आम्राड्बा म्हिला मीरी थो स्वाजी ओच्छे यासे थुर्सी, “एसे तिगै म्राड्जी?” भिसी ड्योइमा, <sup>२४</sup>थे मी आम्राड्बा म्हिसे ओसो च्यासी, “डाइ म्हिगदेदा दोड भ्रबा हड् लसी क्युर्सीन भ्रबा म्राड्बा मुला” भिसी भिजी। <sup>२५</sup>येशूसे दोःसी थे मी आम्राड्बा म्हिला मीरी हाडला यासे थुर्जी। जमाहेन्से थेसे म्राड्जी। <sup>२६</sup>जमाहेन्से थे म्हिदा येशूसे नाम्सारी आवाड्ना दिमरी निउ भिसी पुइजी।

### येशू परमेश्वरला म्हि ख्रीष्ट हिन्ना

मत्ती १६:१३-२०; लूका ९:१८-२१

<sup>२७</sup>जमाहेन्से येशू हाडला चेलागदेदेन छ्याम कैसरिया फिलिप्पी भिबा ग्लाला नाम्सारीक्यार फेप्जी। थेनीगदे ग्यामरी फेप्बान लमा येशूसे हाडला चेलागदेदा “म्हिगदेसे डादा खाल भिमुला?” भिसी ड्योइजी।

<sup>२८</sup>थेनीगदेसे “खालैसे बप्तिस्मा पिन्बा यूहन्ना, खालैसे एलिया, ओच्छे गाते म्हिसे चा अगमवक्तागदे न्हडला गिक हिन्ना भिमुला” भिसी भिजी। \*

<sup>२९</sup>“तर एनीगदेसे चा डा खाल भिसी म्हन्मुला?” भिसी येशूसे ड्योइमा, पत्रुससे “हाड परमेश्वरला म्हि थाबा पिन्बा ख्रीष्ट हिन्ना” भिसी भिजी। \*

<sup>३०</sup>येशूसे थेनीगदेदा “च्यागो, एनीगदेसे चु ताम खालैदा थापाड्गो” भिसी कुल्जी।

### येशूसे हाड खाहड् लसी सिला भिबा ताम चेलागदेदा सुड्बा

मत्ती १६:२१-२८; लूका ९:२२-२७

<sup>३१</sup>जमाहेन्से येशूसे हाडला चेलागदेदा “परमेश्वरसे पुइखबा म्हिसे ल्हानान दुख नातोःला। थेदा यहूदी गन्बागदेसे, परमेश्वरला मन्दिररी पूजा लबा मुल म्हिगदेसे ओच्छे यहूदी धर्मगुरुगदेसे बिरोध लसी साइला। तसैनोन थे सिबाग्याम सोमरेमाकुनु सोला” भिसी सुड्जी। <sup>३२</sup>येशूसे चुहड् भिसी हाडला चेलागदेदा घोना लमाहेन्से पत्रुससे येशूदा जजाकी क्याथाड भोर्सी, “चुहड् थासुड्गो” भिसी बड्जी। <sup>३३</sup>तर येशू स्थान्दो चेलागदेपट्टि फिलक दोःसी थेनीगदेदा स्हीबान पत्रुसदा “शैतान ए चुग्याम थोन्सी निउ! एसे म्हन्बा ताम परमेश्वरला आहिन, म्हिला हिन्ना” भिसी बड्जी।

### चेलागदेसे नातोःबा दुख

मत्ती १६:२४-२८; लूका ९:२३-२७

<sup>३४</sup>जमाहेन्से येशूसे हाडला चेलागदेदेन थेरी मुबा म्हिगदेदा ड्योइसी, “खालै म्हि डाला चेला दोबा सेम मुसम थेसे हाडला ज्याननोन

माया मारब लसी हाडला कुस हाडसेन पुइसी डादेन छ्याम भ्रगै” भिसी सुइजी।\* ३५तिगदा भिसम जुन म्हिसे हाडला ज्यान जोगब लबारी म्हाइला थे म्हिसे जुकजुकधोनाला जुनी आयाइ, तर डादेन थाबा पिन्बा समाचारला लागिरी ज्याननोन पिन्खम्बा म्हिसे चा जुकजुकधोनाला जुनी याइला।\* ३६म्हिसे जम्बुलिडनोन यारी किन्सी हाडला ज्यान चा निजी भिसम थेदा तिग ज्यबा तला? ३७जम्बुलिडरी म्हिला ज्यान भन्दा घेन अर्गु तिगै स्हे मुला? ३८ओच्छे दान्दे पापीदेन नइबा बानीबेहोर थोसी भ्रबा म्हिगदेला ओन्छाडरी जुन म्हि डादेन डाला तामरी पे:ला लिच्छा परमेश्वरला स्वर्गदूतगदेदेन छ्याम परमेश्वरसे पुइखबा म्हि हाडला आबा परमेश्वरला य्हालदेन शक्तिरी खमा थेदा हाडला भिबारी पे:ला।

ओच्छे येशूसे थेनीगदेदा “च्यागो, एनीगदेसे डाला ताम ड्यान्गो, चुरी मुबा म्हिगदे न्हडला कोइ कोइ म्हि चा परमेश्वरला य्हुल्सा शक्तिरी खबा आम्राइतेधोना आसि” भिसी सुइजी।

### येशूला स्थाल पोबा

मती १७:१-१३; लूका ९:२८-३६

२दुरे लिच्छा येशूसे पत्रुस, याकूबदेन यूहन्नादा जे हाडदेन छ्याम नोबा

गडरी भोर्सी फेप्जी। ओच्छे चेलागदेसे च्याना च्यानान येशूला स्थाल पोजी।\* ३येशूला क्वान धिनीला स्हेर हड्बान य्हाल य्हाल तसी चुदे य्हाल य्हाल तजी कि ओते तार मी जम्बुलिडला खजिबै म्हिसे खुसैनोन तना लआखम। ४थे धुइरी थेनीगदेसे एलियादेन मोशा, येशूदेन छ्याम ताम लबान लबा म्हाइजी। ५चु म्हाइसी पत्रुससे येशूदा “गुरु, डनीएनोन चुरी मुबा ज्यबा तजी। दाहेन्से डन्से चुरी छाप्रो सोम स्होइ, गिक हाडला लागिरी, गिक मोशाला लागिरी ओच्छे गिक एलियाला लागिरी” भिसी भिजी। ६थेनीगदे लोड्बासे लमा पत्रुसदा तिग भितो:बा था आरेबा।

७थे धुइरी खसु खसी थेनीगदेदा घप्जी। ओच्छे खसु न्हडग्याम चुहड्बा काइ थे:जी, “चु डाइ सेमहेन्से माया लबा डाला भा हिन्ना, चुसे भिबा ताम एनीगदेसे ड्यान्गो।”\* ८चुहड् भिबा थे:सी थेनीगदेसे क्यारमार च्यामा थेरी येशू बाहेक खालैदा आम्राइनी।

९जमाहेन्से येशू हाडला चेलागदेदेन छ्याम गडग्याम फाप्बान लबा धुइरी येशूसे चेलागदेदा “परमेश्वरसे पुइखबा म्हि सिबाग्याम आसोतेधोना एनीगदेसे तिनी म्हाइबा चु ताम खालैदा थापाङ्गो” भिसी सुइजी। १०थेनीगदेसे येशूसे सुइबा ताम सेमरी थान्जी। तर

थेनीगदेसे चु सिबा ग्याम सोबा भिबा चा तिग हिन्ना भिसी हाड हाड न्हडरी ताम लजी।

११ थेनीगदेसे येशूदा “यहूदी धर्मगुरु-गदेसे तिगदा एलिया अगमवक्ता डाच्छा खतो:ला भिबा?” भिसी ड्योइजी।\* १२ येशूसे थेनीगदेदा चुहड् भिसी सुड्जी, “हिन्ना, डाच्छा एलिया खला ओच्छे थेसे जम्मान ताम ढिकना लला। तर परमेश्वरसे पुइखबा म्हिसे ल्हानान दुख नातो:ला ओच्छे जम्मान म्हिगदेसे थेदा रूलाला भिसी तिगदा भिबा? १३ तर च्यागो, एलिया मी खसी जिन्बा मुला। ओच्छे परमेश्वरला बचनरी भिबा अन्छार थेदा म्हिगदेसे जे लइ म्हन्बा थेनोन लजी।”

### येशूसे म्हडसे स्याप्बा कोलादा खम्ना लबा

मत्ती १७:१४-२०; लूका ९:३७-४३

१४ थेनीगदे स्थान्दो चेलागदे मुबा ग्लारी धोखमा क्युर्नोन म्हिला हुल मुबा। ओच्छे यहूदी धर्मगुरुगदे थेरी चेलागदेदेन छ्याम छलफल लबान मुबा। १५ म्हिगदेसे येशूदा म्हाड्मैछ्याम उदेक म्हन्सी यार्बान निसी येशूदा फ्या लजी। १६ येशूसे थेनीगदेदा “एनीगदे तिग ताम लबान मुला?” भिसी ड्योइमा, १७ म्हिला हुल न्हडग्याम म्हि गिकसे बिन्ती लबान येशूदा “गुरु, डाइ डाला भा हाड मुबा ग्लारी भबा

मुला। म्हडसे स्याप्बासे लमा थेसे ताम पाड्आखम्बा मुला। १८ थेदा म्हडसे भ्याड्बा धुइरी थेसे सुड्ग्याम बोप्स्या ते:मुला। ओच्छे स्वा क्रेसी ककरक कुकरुक तमुला। डाइ हाडला चेलागदेदा थेला ल्हुइग्याम म्हड ताप्सी पिन्गो भिसी बिन्ती लजी, तर थेनीगदेसे आखम्नी” भिसी भिजी।

१९ येशूसे थेनीगदेदा “विश्वास आलबा म्हिगदे, खाइमाधोना डा एनीगदेदेन छ्याम तला? खाइमाधोना डाइ एनीगदेदा नासे? थेदा डा मुबा ग्लारी भउ” भिसी सुड्जी।

२० थेनीगदेसे थे म्हडसे स्याप्बा कोलादा येशू मुबा ग्लारी भजी। येशूदा म्हाड्मैछ्याम थे म्हडसे थे कोलादा लछार पछार लसी सरी हिल्ला लजी। ओच्छे सुड्ग्याम बोप्स्या ते:बान ककरक कुकरुक तना लजी। २१ ओच्छे येशूसे थे म्हडसे स्याप्बा कोलाला आबादा “खाइमाहेन्से चुहड् तबा?” भिसी ड्योइजी। थेला आबासे येशूदा चुहड् भिसी भिजी, “चुदा जजाहेन्सेन चुहड् तबा हिन्ना। २२ थेदा साइबारी म्हडसे घरिघरि मेरी, क्युइरी भ्याड्बा मुला। गुरु, हाडसे खम्सम डन्दा दया लसी खम्ना लपिन्गो।” २३ येशूसे थेदा “खम्सम भिसी तिगदा भिबा? विश्वास लबादा जम्मान तखम्ला” भिसी सुड्जी। २४ येशूसे चुहड् सुड्माहेन्से थे म्हडसे स्याप्बा कोलाला आबासे

क्रिड्बान भिजी, “गुरु, डाइ विश्वास लला। विश्वास लबारी डादा हो लउ।”

२५ म्हिंला हुल हाड मुबापट्टि यार्बान खबा म्राड्सी येशूसे म्हडदा “ताइधोना लबादेन नाब्यड थे:ना आलबा म्हड ए थे कोलाला ल्हुइग्याम थोन्सी निउ! दो:सी खाइमै चु कोलाला ल्हुइरी थावाङ्गो” भिसी बड्जी। २६ जमाहेन्से थे म्हड क्रिड्सी थे कोलादा लछार पछार लबान थोन्सी निजी। म्हड थोन्सी निबा धुइरी थे कोला सिबा तेबान तजी। ओच्छे थेरी मुबा ल्हानान म्हिगदेसे सिजीम भिसी म्हन्जी। २७ तर येशूसे थेला यारी चुड्सी थीमाहेन्से थे डोड रे:जी।

२८ दिम न्हडरी वाड्माहेन्से खालै आरेबा धुइरी येशूदा चेलागदेसे “तिगदा डन्से थे म्हडदा ताप्बारी आखम्नी” भिसी ड्योइजी।

२९ येशूसे हाडला चेलागदेदा “चुहड्बा म्हडदा चा प्रार्थनाग्यामसे जे ताप्खम्ला, तर अर्गु तिगै लसी ताप्आखम” भिसी सुड्जी।

**दो:सी येशूसे हाड खाहड् लसी  
सिला भिसी सुड्बा**

मत्ती १७:२२-२३; लूका ६:४३-४५

३० येशूदेन थेला चेलागदे थे ग्ला ख्लासी गालील अञ्चलग्याम तबान फेप्जी। हाड खानड मुला भिसी

म्हिगदेसे था थायाङ्गै भिबा येशूला सेम मुबा। ३१ तिगदा भिसम येशूसे हाडला चेलागदेदा लोप्बान मुबा। थे धुइरी येशूसे थेनीगदेदा “परमेश्वरसे पुइखबा म्हिदा चुड्सी म्हिगदेला यारी जिम्मा पिन्ना। थेनीगदेसे थेदा साइला, तसैनोन सोमरेमाकुनु थे सिबाग्याम सोला” भिसी सुड्जी ३२ तर चेलागदेसे चु ताम आघोनी, ओच्छे दो:सी येशूदेन छ्याम चु ताम ड्योइबारी थेनीगदे लोड्जी।

**जम्मान भन्दा घेन खाल?**

मत्ती १८:१-५; लूका ६:४६-५०

३३ थेनीगदे कफर्नहुम नाम्सारी धोमाहेन्से जम्मान दिमरी मुबा धुइरी येशूसे चेलागदेदा “दोलो एनीगदे ग्यामरी तिग ताम लबान मुबा?” भिसी ड्योइजी। ३४ तर थेनीगदे कुटिसी चिजी। तिगदा भिसम थेनीगदेसे “यहाड न्हडला खाल घेन हिन्ना” भिसी हाड हाड न्हडरी ताम लबा मुबा।\* ३५ ओच्छे येशू धन्छ्यासी हाडला च्युक न्ही चेलागदेदा ड्योइसी, “खालै घेन दोबा सेम मुसम थे जम्मान भन्दा जजा तसी जम्मालान सेवा लतो:ला” भिसी सुड्जी।\*

३६ जमाहेन्से येशूसे थेनीगदेला गुडरी कोला गिकदा भजी। ओच्छे थे कोलादा हाडला कुरी किन्सी चेलागदेदा, ३७ “डाला मिनरी चुहड्बा

कोलागदेदा वास्ता लबासे डादा वास्ता लला, ओच्छे डादा वास्ता लबासे डादा जे आहिन, डादा पुइखबा डाला आबादाएनोन वास्ता लला” भिसी सुङ्जी।\*

३८जमाहेन्से यूहन्नासे येशूदा “गुरु, डन्से हाडला मिनरी म्हि गिकसे म्हड ताप्बा म्राङ्जी। तर डन्से थेदा थेहङ् लआपुङ्नी तिग्दा भिसम थे म्हि यहाडदेन छ्याम भ्रबा म्हि आहिन” भिसी भिजी। ३९येशूसे थेनीगदेदा चुहङ् भिसी सुङ्जी, “एनीगदेसे थेदा थेहङ् थालउ। तिग्दा भिसम डाला मिनरी उदेकला गे लबासे खाइमै डाला बिरोध आल। ४०यहाडदा बिरोध आलबा म्हि चा यहाडपट्टिला हिन्ना।\* ४१च्यागो, खालैसे एनीगदेदा थार्बा पिन्बा स्त्रीष्टदा विश्वास लबा म्हि भिसी क्युइ<sup>†</sup> जे थुङ्बारी पिन्सैनोन थे म्हिसे याङ्तो:बा इनाम याङ्ला।”\*

### स्थान्दोदा पाप लपुङ्बा म्हिसे याङ्तो:बा सजाय

मत्ती १८:६-९; लूका १७:१-२

४२दो:सी येशूसे थेनीगदेदा चुहङ् भिसी सुङ्जी, “जुन म्हिसे डादा विश्वास लबा चु कोलागदे न्हडला

गिकदा पाप लपुङ्ला, थेहङ्बा म्हिदा मी खारेरी हान्दा च्योसी समुन्द्ररी भ्याङ्बा ज्यबा तला। ४३चुदे एला यासे पाप लपुङ्जी भिसम थे थासी भ्याङ्गो। या न्ही मुसी नर्गरी खाइमै आसिबा मेरी निबा भन्दा बरु ठुडे तसी जुकजुकधोनाला जुनी याङ्बा चा एला लागिरी ज्यबा हिन्ना।\* ४४नर्गरी न्ह च्योलोड सिला न्ह मेनोन सिला।† ४५ओच्छे एला काडसे एदा पाप लपुङ्जी भिसम थे थासी भ्याङ्गो। काड न्ही मुसी नर्गरी निबा भन्दा बरु कुज्या तसी जुकजुकधोनाला जुनी याङ्बा चा एला लागिरी ज्यबा हिन्ना। ४६नर्गरी न्ह च्योलोड सिला, न्ह मेनोन सिला। ४७एला मीसे एदा पाप लपुङ्जी भिसम ते:सी भ्याङ्गो मी न्ही मुसी नर्गरी निबा भन्दा मी गिक ते:सी भ्याङ्सी परमेश्वरला य्हुल्सारी वाङ्बा एदा ज्यबा तला।\* ४८नर्गरी न्ह च्योलोड सिला, न्ह मेनोन सिला।\* ४९जम्मान म्हिगदेदा मेसे खारेब लसी चजा डम्बा हङ्बा दोना लला।† ५०चजा ज्यबा स्हे हिन्ना, तर चजाला डम्बा म्हाजी भिसम थे दो:सी तिग्से डम्ना लबा? थेतबासेलमा एनीगदेसेनोन हाड हाड न्हडरी चजा

६:४१ “क्युइ” नेपाली बाइबलदेन ग्रीक बाइबलरी चा “कचौर नाड क्युइ” भिसी भिबा मुला।

६:४४, ४६ चु पदगदेला ताम ल्हानान हङ्बा ग्रीक बाइबलरी भिबा आरे।

६:४६ ग्रीक बाइबलरी मेग्याम चजा डम्बा दोना लला भिसी भिबा मुला।

६:३७ मत्ती १०:४०; लूका १०:१६; यूह १३:२० ६:४० मत्ती १२:३०; लूका ११:२३

६:४१ मत्ती १०:४२ ६:४३ मत्ती ५:३० ६:४७ मत्ती ५:२६ ६:४८ यशे ६६:२४

थान्गो ओच्छे हाड हाड न्हडरी  
ढिक्सी चिउ।”\*

### छोडपत्रला बारेरी लोप्बा ताम

मती १६:१-१२; लूका १६:१८

१० येशू थे ग्ला ख्लासी यर्दन  
स्योडला क्याम्सडपट्टि  
यहूदिया अञ्चलरी फेप्जी। थेरीनोन  
म्हिला हुल पोप तजी, ओच्छे येशूसे  
दोःसी डाच्छाला हड लसी थेनीगदेदा  
लोप्जी। २फरिसीगदेसे येशूला सेम  
च्याबाला लागिरी येशूदा “खालै म्हिसे  
हाडला म्रिडदेन छोडपत्र लबारी तला  
कि आत?” भिसी ड्योडजी। ३येशूसे  
थेनीगदेदा “एनीगदेदा मोशासे तिग  
भिसी कुल्बा मुला?” भिसी सुड्जी।

४थेनीगदेसे, “खालैसे हाडला  
म्रिडदा ख्लातोःसम छोडपत्र भिसी  
ख्लाबारी तला भिसी मोशासे पाड्बा  
मुला” भिसी भिजी।\*

५येशूसे थेनीगदेदा चुहड् भिसी  
सुड्जी, “एनीगदेला सेम कोड्बासे  
लमा मोशासे चुहड् भिसी कुल्बा  
हिन्ना। ६तर परमेश्वरसे जम्बुलिड  
छ्यामाहेन्सेन थेनीगदेदा हेम्कोलादेन  
म्रिडकोला लसी स्होबा हिन्ना।\*

७थेतबासेलमा म्हिसे हाडला आबादेन  
आमादा ख्लासी हाडला म्रिडदेन  
छ्याम ढिक्सी चिमुला। ८ओच्छे थेन्नी  
लहुड गिक हड्बान तला’ दाहेन्से

थेन्नी न्ही आहिन, तर गिक हड्बान  
हिन्ना।\* ९थेतबासेलमा परमेश्वरसे  
स्होबा जोडीदा खालै म्हिसे थाफेगै।”

१०येशू हाडला चेलागदेदेन छ्याम  
दिमरी धन्छ्याबा धुडरी चेलागदेसे  
येशूदा थे तामला बारेरी ड्योडजी।  
११येशूसे थेनीगदेदा चुहड् भिसी  
सुड्जी, “खालै म्हिसे हाडला म्रिडदेन  
छ्याम छोडपत्र लसी स्थान्दो  
म्रिडम्हेमेदेन छ्याम ब्याह लजी भिसम  
डाच्छाला म्रिडला बिरोधरी थे ब्रेल्सी  
भ्रबा हिन्ना। १२ओच्छे थेहड् लसी  
हाडला हेम्बोदेन छ्याम छोडपत्र  
लसी स्थान्दो हेम्फेबेदेन छ्याम  
ब्याह लजी भिसम थेएनोन हाडला  
डाच्छाला हेम्बोला बिरोधरी ब्रेल्सी  
भ्रबा हिन्ना।”\*

### येशूसे कोलागदेदा मोलम पिन्बा

मती १६:१३-१५; लूका १८:१५-१७

१३येशूसे हाडला छ्या कोलागदेथोरी  
थान्सी मोलम पिन्नै भिसी म्हिगदेसे  
हाडला कोलागदेदा येशू मुबा ग्लारी  
भजी। तर येशूला चेलागदेसे थे  
कोलागदे भबा म्हिगदेदा बड्जी।  
१४चेलागदेसे चुहड् लबा म्राड्सी  
येशूदा बोमो रेःजी। ओच्छे थेनीगदेदा  
चुहड् भिसी सुड्जी, “कोलागदेदा डा  
मुबा ग्लारी खपुड्गो, थेनीगदेला ग्याम  
थाकागो। तिगदा भिसम परमेश्वरला

६:५० मती ५:१३; लूका १४:३४-३५ १०:४ व्यव २४:१-४; मती ५:३१

१०:६ उत्प १:२७; ५:२ १०:७-८ उत्प २:२४ १०:११-१२ मती ५:३२; १ कोर ७:१०-११

यहुल्सा चु कोलागदे हड्बालान हिन्ना।  
 १५ एनीगदेसे डाला ताम ड्यान्गो,  
 जुन म्हिसे चु कोलागदेसे हड् लसी  
 परमेश्वरला यहुल्सादा विश्वास आल  
 थे म्हि परमेश्वरला यहुल्सारी खाइमै  
 वाड्आम्याड्।\* १६ जमाहेन्से येशूसे  
 कोलागदेदा हाडला कुरी किन्सी  
 थेनीगदेथोरी हाडला छ्या थान्सी  
 मोलम पिन्जी।

### परमेश्वरला यहुल्सादेन फ्युक्पो म्हि

मत्ती १६:१६-३०; लूका १८:१८-३०

१७ येशू ग्यामरी फेप्बान लबा धुइरी  
 म्हि गिक यार्बान खसी पुइ जूबान  
 येशूदा “ज्यबा गुरु, जुकजुकधोनाला  
 जुनी याड्बाला लागिरी डाइ तिग  
 लतो:ला?” भिसी ड्योइजी।

१८ येशूसे थेदा चुहड् भिसी सुड्जी,  
 “एसे डादा तिगदा ज्यबा भिबा?  
 परमेश्वर बाहेक खालै ज्यबा  
 आरे। १९ परमेश्वरसे कुल्बा ताम  
 एदा थानोन मुला। म्हि थासाइगो,  
 स्थहान्दोदेन छ्याम ब्रेल्सी थाभ्रउ, य्हो  
 थालउ, लुसीला ताम पाड्सी थाभ्रउ,  
 ठगब थालउ, ओच्छे हाडला आबा  
 आमदा मान लउ।”\*

२० थेसे येशूदा “प्रभु, चु गे मी डाइ  
 जत्धुगुहेन्सेन लबान मुला” भिसी  
 भिजी। २१ येशूसे थेदा स्हीबान माया  
 लसी चुहड् भिसी सुड्जी, “अभन  
 एसे गे गिक लतो:बा मुला। दाहेन्से ए

निसी एला जम्मान धन सम्पत्ति चूड्सी  
 प्राडबोगदेदा भो लसी पिन्गो। एसे  
 स्वर्गरी धन सम्पत्ति याड्ला, ओच्छे  
 डादेन छ्याम भ्रउ।”

२२ चु तामसे थेला ली धोपधोप  
 तजी। ओच्छे दुख ड्हम्सी निजी।  
 तिगदा भिसम थेदेन छ्याम ल्हानान धन  
 सम्पत्ति मुबा।

२३ येशूसे क्युर्नोन स्हीसी हाडला  
 चेलागदेदा “फ्युक्पो म्हिदा परमेश्वरला  
 यहुल्सारी वाड्बारी गाते गाहो मुला”  
 भिसी सुड्जी। २४ चुहड्बा तामसे  
 चेलागदे उदेक म्हन्जी। तर येशूसे  
 अभ थेनीगदेदा चुहड् भिसी सुड्जी,  
 “च्यागो कोलागदे, धन सम्पत्तिथोरी भर  
 लबा म्हिगदेदा परमेश्वरला यहुल्सारी  
 वाड्बारी गाते गाहो मुला? २५ फ्युक्पो  
 म्हिदा परमेश्वरला यहुल्सारी वाड्बारी  
 भन्दा बरु ऊँटदा दापला मीग्याम  
 वाड्बारी सजिलो तला।” २६ चु ताम  
 थे:सी चेलागदे भन उदेक म्हन्सी,  
 “थेहड् भिसम खाल्से थार्बा याड्ला?”  
 भिसी भिजी। २७ येशूसे थेनीगदेदा  
 स्हीबान, “चु गे म्हिसे लबारीन आखम्बा  
 गे हिन्ना, तर परमेश्वरसे खम्ला, तिगदा  
 भिसम परमेश्वरसे लआखम्बा गे तिगै  
 आरे” भिसी सुड्जी।

२८ जमाहेन्से पत्रुससे येशूदा “डन्से  
 डन्ना जम्मान स्हे र्लासी हाडदेन  
 छ्याम भ्रबा मुला” भिसी भिमा,  
 २९ येशूसे चुहड् भिसी सुड्जी,

“च्यागो, एनीगदेसे डाला ताम ड्यान्गो, खालैसे डादेन थाबा पिन्बा समाचारला लागिरी हाडला आबा आमा, भा भामे, ज्योज्यो आले, नाना आडा, दिमनाम रूलाला, ३०थेसे नाबा दुखदेन छ्यामनोन दान्देन थे भन्दा ल्हाना दिमनाम, आबा आमा, भा भामे, ज्योज्यो आले, नाना आडा याड्ला। ओच्छे खबा धुइरी थेसे जुकजुकधोनाला जुनी याड्ला। ३१तर दान्दे डाच्छा मुबागदे न्हडला ल्हानान म्हि लिच्छा तला, दान्दे लिच्छा मुबागदे चा डाच्छा तला।”\*

**दोःसी येशूसे हाड खाहड लसी  
सिला भिबा ताम सुड्बा**

मती २०:१७-१६; लूका १८:३१-३४

३२थेनीगदे यरूशलेमपट्टि फेप्वान लबा धुइरी येशू चेलागदे भन्दा डाच्छा डाच्छा भ्रवान मुबा। ओच्छे चेलागदे उदेक तजी, तर स्थहान्दो लिच्छा भ्रबा म्हिगदे चा लोड्जी। दोःसीनोन येशूसे हाडला च्युक न्ही चेलागदेदा कुनी गिकरी भोर्सी हाडथोरी तिग तला भिबा तामला बारेरी चुहड् भिसी सुड्जी। ३३-३४“च्यागो, दान्दे यहाड यरूशलेमपट्टि निबान मुला। परमेश्वरसे पुइखबा म्हिदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेला यारी जिम्मा पिन्ना। जमाहेन्से थेनीगदेसे

साइनोन तोःला भिसी अर्गु यहुलला म्हिगदेला यारी जिम्मा लला। ओच्छे थेनीगदेसे थेदा थो स्वासी खिसी लला ओच्छे कोर्गसे तोसी साइला। तसैनोन थे सोमरेमाकुनु सिबाग्याम सोला।”

**याकूबदेन यूहन्नासे लबा बिन्ती**

मती २०:२०-२८

३५जमाहेन्से जब्दियाला भा याकूबदेन यूहन्ना येशू मुबा ग्लारी खसी, “गुरु, डन्से ह्रीबा स्हे पूरा लसी पिन्गो भिबा डन्ना सेम मुला” भिसी थेनीगदेसे बिन्ती लजी।

३६“डाइ एनीगदेला लागिरी तिग लतोःजी?” भिसी येशूसे थेनीगदेदा ड्योइजी।

३७“हाड स्वर्गला यहाल यहाल्बा मान याड्बा ठिरी धन्छ्यामा डनी ज्योज्यो आलेदा हाडला दाहिनेपट्टिदेन देब्रेपट्टि चिपुड्गो” भिसी थेनीगदेसे भिजी।

३८“तिग ह्रीदोबा भिसी एनीगदेदा थानोन आरे। डाइ नाबा दुख एनीगदेसे नाबारी खम्ला? डाइ किन्बा बप्तिस्मा एनीगदेसे किन्खम्ला?” भिसी येशूसे थेनीगदेदा सुड्जी।\*

३९जमाहेन्से थेनीगदेसे येशूदा “खम्ला” भिसी भिजी।

जमाहेन्से येशूसे चुहड् भिसी सुड्जी, “एनीगदेसे डाइ नाबा दुख मी नाला, ओच्छे डाइ किन्बा बप्तिस्माएनोन एनीगदेसे किन्ना। ४०तर डाला



दाहिने देब्रे चिपुड्बा अधिकार डाला यारी आरे। चु ग्ला परमेश्वरसे जुन म्हिला लागिरी स्होबा हिन्ना थे जे चिम्याड्ला।”

४१ चु ताम थे:सी चेला च्युइदा चा याकूब, यूहन्ना म्राड्सी बोमो रे:जी। ४२ तर येशूसे थेनीगदेदा हाड मुबा ग्लारी ड्योइसी चुहड् भिसी सुड्जी, “च्यागो, एनीगदेदा चु ताम थानोन मुला, अर्गु यहुलला शासन लबा म्हिगदेसे हाडला सेमसे म्हन्बा अन्छार म्हिगदेशोरी शासन लमुला। ओच्छे घेन घेन पदरी मुबा म्हिगदेसे हाड भन्दा धिरी मुबा म्हिगदेशोरी शासन लमुला। ४३ तर एनीगदे चा थेहड् तबारी आत। जुन म्हि जम्मान भन्दा घेन दोबारी म्हाइला थेसे चा एनीगदेला सेवा लतो:ला।\* ४४ जुन म्हि जम्मान भन्दा डाच्छा तबारी म्हाइला थे म्हि चा जम्मालान नोकर दोतो:ला।\* ४५ तिगदा भिसम परमेश्वरसे पुइखबा म्हिएनोन स्थहान्दोगदेग्याम सेवा किन्बारी आहिन, तर स्थहान्दोगदेला सेवा लबारी ओच्छे हाडलान ज्यान पिन्सी ल्हानान म्हिगदेला पापला सय फाबारी खबा हिन्ना” भिसी सुड्जी।

### मी आम्राड्बा बारतित्मै

मती २०:२६-३४; लूका १८:३५-४३

४६ येशू हाडला चेलागदेदेन छ्याम यारीहो नाम्सारी धोखजी। थे नाम्सा

ख्लासी निबा धुइरी ल्हानान म्हिला हुल थेनीगदेदेन छ्याम छ्याम खजी। ग्यामला कुनीरी तिमैला भा बारतित्मै भिबा मी आम्राड्बा म्हि गिक हीसी चिबा मुबा। ४७ नासरतला येशू खबा थे:सी थेसे “दाऊद ग्लेला सन्तान येशू, डादा दया लउ!” भिसी क्रिड्बारी छ्याइजी।

४८ ल्हानान म्हिगदेसे थेदा “कुटिसी चिउ” भिसी बड्जी। तर भन थेसे “दाऊद ग्लेला सन्तान येशू, डादा दया लउ!” भिसी क्रिड्बान भिजी।

४९ येशू थेन तसी, “थेदा चुरी ड्योइगो!” भिसी सुड्जी। ओच्छे थेनीगदेसे थे मी आम्राड्बा म्हिदा ड्योइसी, “भड लउ, एदा येशूसे ड्योइबान मुला, योनान रे:सी खउ।” भिसी भिजी। ५० जमाहेन्से थे मी आम्राड्बा म्हि हाडला घ भ्याड्सी छ्योड्बान येशू मुबा ग्लारी खजी।

५१ येशूसे थेदा “डाइ एला लागिरी तिग लगै भिसी म्हन्बा मुला?” भिसी ड्योइजी, थे मी आम्राड्बा म्हिसे “गुरु, डाला मी म्राड्ना लसी पिन्गो” भिसी बिन्ती लजी। ५२ येशूसे थेदा “एसे विश्वास लबासे लमा ए खम्बा मुला। दाहेन्से ए निउ” भिसी सुड्जी। येशूसे थेहड् सुड्मैछ्याम थेसे म्राड्जी ओच्छे येशूदेन छ्याम भ्रजी।

## येशू यरूशलेमरी फेप्बा

मत्ती २१:१-११; लूका १९:२८-३८;

यूहन्ना १२:१२-१५

११ येशूदेन थेला चेलागदे यरूशलेम डामला जैतून गडला बेथफागेदेन बेथानिया भिबा नाम्सारी धोखमा येशूसे ह्राडला चेलागदे न्हडला न्हीदा पुइजी। <sup>२</sup>पुइबा धुइरी चुहड् भिसी सुइजी, “एनी जजाकी क्याथाडला नाम्सारी निउ। नाम्सारी धोमैछ्याम एनीसे दान्देधोना खालै आक्रे:बा गधाला कोला गिक स्याप्ला। थेदा बलसी चुरी भसी खउ। <sup>३</sup>थेरी एनीदा खालैसे चु तिग लबा? भिसी इयोइसम, चु प्रभुदा तो:बा मुला, प्रभुसे योनान दो:सी पिन्ना भिउ” भिसी पुइजी।

<sup>४</sup>थेनी निमा ग्याम डामला दिमला खाडगारी गधाला कोला च्युन्सी थान्बा स्याप्जी। थेनीसे थे गधाला कोलादा बलबारी छ्याइमा, <sup>५</sup>थेरी राप्सी चिबा म्हिगदेसे “एनीसे थे गधाला कोलादा बलसी तिग लबारी छ्याइबा?” भिसी इयोइजी। <sup>६</sup>येशूसे सुइबा हड् नोन चेला न्हीसे थेरी मुबा म्हिगदेदा भिजी, जमाहेन्से थे म्हिगदेसे गधाला कोला भोर्पुइजी।

<sup>७</sup>थे गधाला कोलादा चेला न्हीसे येशू मुबा ग्लारी भसी ह्राड ह्राडला घ गधाला कोलाथोरी तीसी पिन्जी,

ओच्छे येशू गधाला कोलाथोरी क्रे:जी। <sup>८</sup>ल्हानान म्हिगदेसे ग्यामरी ह्राड ह्राडला घगदे तीजी, ओच्छे स्थान्दोगदेसे चा भलेग्याम स्याउला भसी तीजी। <sup>९</sup>येशूला लिच्छा डाच्छा भ्रबा म्हिगदेसे चुहड् भिसी क्रिड्बारी छ्याइजी

“परमेश्वरदा जयजयकार तगै, परमप्रभुला मिनरी फेप्खबासे परमेश्वरग्याम मोलम याइगै।\* ”

<sup>१०</sup>य्हाडला आखे म्हेमे दाऊद ग्लेला खबा चु य्हुल्सादा परमेश्वरसे मोलम पिन्गै।

ओच्छे स्वर्गरी धन्छ्याबा परमेश्वरला जयजयकार तगै।”

<sup>११</sup>यरूशलेमरी धोखमाहेन्से येशू परमेश्वरला मन्दिर न्हडरी वाइजी। ओच्छे थेसे परमेश्वरला मन्दिरला क्युर्सीन स्हीजी। तर घइबासे लमा येशू ह्राडला च्युक न्ही चेलागदेदेन छ्याम बेथानिया नाम्सारी फेप्जी।

## तिगै आरोबा अञ्जीरला दोड

मत्ती २१:१८-१९

<sup>१२</sup>न्हडगरदडसे थेनीगदे बेथानिया-ग्याम यरूशलेमपट्टि फेप्बा धुइरी येशूदा फोखेन्जी। <sup>१३</sup>येशूसे जजाकी क्याथाड अञ्जीरला दोड गिक म्राइजी। थेरी



टाङ्गा देण्बागदेला टेबुलदेन हुकुर चूड्बागदेला  
चिबा ग्लागदे जम्मान भ्याङ्बा (११:१५)

अञ्जीर मुजी वा भिसी येशूसे स्हीबारी फेप्जी। तर थे दोडरी भानोन भा जे मुबा। तिगदा भिसम थे धुइरी अञ्जीर रोबा धुइ तबा आरेबा। १४ जमाहेन्से येशूसे “दाहेन्से एग्याम रोबा अञ्जीर खाइमै खालैसे थाचगै” भिसी सुङ्जी। चु ताम थेला चेलागदेसे थे:जी।

**येशू परमेश्वरला मन्दिररी फेण्बा**

मत्ती २१:१२-१७; लूका १९:४५-४७;  
यूहन्ना २:१३-२२

१५ येशू हाडला चेलागदेदेन छ्याम यरूशलेमरी धोमाहेन्से परमेश्वरला

मन्दिर न्हडरी चूड्बादेन ग्लुबागदेदा ताप्जी। थेसे थेरी चूड्बा ग्लुबा लबा जम्मान व्यापारीगदेदा ताप्जी। ओच्छे टाङ्गा देण्बारी चिबागदेला टेबुलदेन हुकुर चूड्बारी चिबागदे जम्मालान चिबा ग्लागदे प्लाड प्लिड लसी भ्याङ्जी। १६ जमाहेन्से येशूसे परमेश्वरला मन्दिरग्याम खालैदा तिगै स्हे भोर्बारी आपिन्नी भबारी एनोन आपिन्नी। १७ ओच्छे येशूसे जम्मान म्हिगदेदा लोण्बान, “तिग परमेश्वरला बचनरी चुहङ्ग् भिबा आरे? ‘डाला दिमदा यहुल

यहुलला म्हिगदेसे प्रार्थना लबा दिम भिसी भिला।' तर एनीगदेसे मी डाला दिमदा य्होगदे चिबा ग्ला सहोबा मुला" भिसी सुङ्जी।\*

१८ चु ताम परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे थे:सी येशूदा खाहङ् लसी साइबा भिसी दाउ च्यासी भ्रबारी छ्याइजी। तिग्दा भिसम येशूसे लोप्बा तामरी जम्मान म्हिगदे उदेक म्हन्मुबा। थेतबासेलमा थेनीगदे येशूदेन छ्याम लोङ्मुबा। १९ ड्यसे तमाहेन्से येशू हाडला चेलागदेदेन छ्याम यरूशलेम शहरग्याम फेप्जी।

### विश्वासग्याम उदेकला गे तबा

मत्ती २१:२०-२२

२० न्हङगरदङ् स्थोरी थेनीगदे डाच्छालाग्याम्से निबान लमा थेनीगदेसे थे अञ्जीर दोड टाहेन्सेन खर्बा म्राङ्जी। २१ येशूसे थे अञ्जीर दोडदा के:बा ताम ढन्सी पत्रुससे "रब्बी, हाडसे के:बा थे अञ्जीरला दोड मी सिजीम" भिसी भिमा, २२ येशूसे हाडला चेलागदेदा "परमेश्वरथोरी विश्वास लउ" भिसी सुङ्जी। २३ दो:सी येशूसे थेनीगदेदा चुहङ् भिसी सुङ्जी, "एनीगदेसे डाला ताम ड्यान्गो, चुदे एनीगदेसे सेमरी तिगै शङ्का आलना

हाडला सेमरी म्हन्बा ताम पूरा तला भिसी विश्वास लसी चु गडदा 'ए होक निसी समुन्दरी ताइगो' भिजी भिसम एनीगदेला लागिरी थेहङ्नोन तला।\* २४ थेतबासेलमा एनीगदेसे प्रार्थना लमा तिग ह्रीबा मुला, थे डाइ याङ्जी भिसी विश्वास लजी भिसम एनीगदेसे याङ्ला। २५ तर एनीगदेसे प्रार्थना लबारी छ्याइबा धुइरी खालैला बिरोधरी तिगै आज्यबा ताम मुसम थेदा माफ लउ। स्वर्गरी मुबा एनीगदेला परमेश्वर आबासेनोन एनीगदेला पाप माफ लला। २६ तर एनीगदेसे माफ आलनी भिसम स्वर्गरी मुबा एनीगदेला परमेश्वर आबासेनोन एनीगदेला पाप माफ आल।† \*

### येशूला अधिकारला बारेरी ड्योइबा

मत्ती २१:२३-२७; लूका २०:१-८

२७ दो:सी येशू हाडला चेलागदेदेन छ्याम यरूशलेम शहररी फेप्खजी। मन्दिररी भ्रबान लमा परमेश्वरला मन्दिररी पूजा लबा मुल म्हिगदे, यहूदी गन्बागदे ओच्छे यहूदी धर्मगुरुगदे येशू मुबा ग्लारी खसी, २८ "हाडसे खानङ्ग्याम अधिकार याङ्सी चु गे लबा हिन्ना? हाडदा चु अधिकार खाल्से पिन्बा हिन्ना?" भिसी ड्योइजी।

११:२५-२६ चु पदला ताम ल्हानान ग्रीक बाइबलरी भ्रिबा आरे।

११:१७ यशै ५६:७; यर्मि ७:११ ११:२३ मत्ती १७:२०; १ कोर १३:२

११:२५-२६ मत्ती ६:१४-१५

२६ येशूसे थेनीगदेदा चुहड् भिसी ड्योइजी, “एनीगदेदाएनोन डाइ ताम गिक ड्योइला। थे तामला जोहाब पिन्जी भिसम डादा चु गेगदे लबारी खाल्से अधिकार पिन्जी थे एनीगदेदा पाड्ला। ३० यूहन्नासे पिन्बा बप्तिस्मा परमेश्वरग्याम मुबा कि म्हिग्याम मुबा? डादा पाड्गो।” ३१ जमाहेन्से थेनीगदे हाड हाड न्हडरी ताम लसी, “चुदे यहाडसे परमेश्वरग्याम भिजी भिसम थेसे यहाडदा ‘थेहड् भिसम एनीगदेसे तिगदा यूहन्नादा विश्वास आलबा?’ भिसी भिला। ३२ तर म्हिगदेग्याम भिबारीनोन आत।” थेनीगदे म्हिला हुल म्राड्सी लोड्जी। तिगदा भिसम जम्मान म्हिगदेसे यूहन्नादा अगमवक्ता हिन्ना भिसी भिमुला।

३३ थेतबासेलमा थेनीगदेसे “डन्दा था आरे” भिसी येशूदा जोहाब पिन्जी। येशूसे थेनीगदेदा “थेहड् भिसम डाइएनोन चु गेगदे खाल्ला अधिकारग्याम लबा हिन्ना, थे एनीगदेदा आपाड्” भिसी सुड्जी।

### अधियाँ स्होबा म्हिगदेला उखान

मत्ती २१:३३-४६; लूका २०:९-१६

१२ येशूसे थेनीगदेदा उखान-ग्याम चुहड् भिसी सुड्बारी छ्याइजी, “म्हि गिकसे वारीरी अडगुर सूसी क्युर्सिन पर्खाल लजी। ओच्छे अडगुर म्हर्बारी कोल स्होसी

अडगुर वारी खुड्बारी नोबा छाप्रो गिक स्होजी। जमाहेन्से अधियाँरी पिन्सी थे अर्गु यहुल्सारी निजी।\* २ अडगुर मिन्बा धुइ तमाहेन्से थे पयुक्पो म्हिसे हाडला भो किन्बाला लागिरी अधियाँ लबागदे मुबा ग्लारी हाडला नोकरगदेदा पुइजी। ३ तर थे अधियाँ लबागदेसे थेदा चुड्सी तोबा ग्याड्बा लसी तिगै आपिन्ना पुइजी। ४ ओच्छे थेसे स्थहान्दो नोकरदा पुइजी, तर थेनीगदेसे थेला थोबोरी तोसी बेइज्जत लसी पुइजी। ५ थेसे अफ् स्थहान्दो नोकरदा पुइजी। थेनीगदेसे थेदाएनोन साइजी। चुहड् लसी थेनीगदेसे कोइदा साइबा कोइदा तोबा लजी।

६ “दाहेन्से थेदेन छ्याम थेसे सेमहेन्सेन माया लबा भा गिक जे बाँकी मुबा। जम्मादान पुइसी जिन्माहेन्से ‘थेनीगदेसे डाला भादा मी मान लला तला’ भिसी थेसे हाडला भादा थेनीगदे मुबा ग्लारी पुइजी। ७ तर अधियाँ लबागदेसे ‘चु मी यहाडला धनीला भा हिन्ना, यहाडसे थेदा साइगे। जमाहेन्से थेला सम्पत्ति यहाडलान तला’ भिसी हाड हाड न्हडरी ताम लजी। ८ ओच्छे थेनीगदेसे थेदा चुड्सी साइसी थेदा वारीग्याम पाखारी भ्याड्जी।

९ “दाहेन्से थे अडगुर वारीला धनीसे तिग लला? थे खसी अधियाँ लबा

म्हिगदेदा साइला ओच्छे थे अडगुरला वारी स्थहान्दोगदेदा स्होबारी पिन्ना।  
१० एनीगदेसे परमेश्वरला बचन खाइमै पढब लबा आरे?

‘जुन युडबादा दिम स्होबा कर्मीगदेसे गे आखेल भिसी भ्याड्बा मुबा,  
थेनोन युडबा दिमला सुर युडबा दोजी।

११ चु परमप्रभुग्याम तबासे लमा यहाडला लागिरी उदेकला ताम हिन्ना’

भिसी भिबा मुला।\*’

१२ येशूसे सुड्बा ताम यहाडला बिरोधरी चीम भिसी यहूदी धर्मगुरुगदेसे था याड्सी थेनीगदेसे येशूदा चुड्बारी म्हाइजी। तिग्दा भिसम चु उखान येशूसे थेनीगदेलान बिरोधरी सुड्बा हिन्ना भिबा ताम थेनीगदेदा था मुबा। तर म्हेला हुलसे लमा थेनीगदे लोड्सी येशूदा चुड्बारी आखम्नी। थेतबासेलमा थेनीगदेसे येशूदा रूलासी निजी।

**रोमी ग्याल्बोदा तिरो फातो:बा कि फाआतो:बा भिसी येशूदा ड्योइबा**

मती २२:१५-२२; लूका २०:२०-२६

१३ जमाहेन्से तामनोन तामरी येशूदा फसब लइ भिसी यहूदी धर्मगुरुगदेसे फरिसीदेन हेरोदीगदेला कोइ कोइ म्हिगदेदा येशू मुबा ग्लारी पुइजी।

१४ थेनीगदे येशू मुबा ग्लारी खसी, “गुरु, ह्राड सत्यला म्हे हिन्ना, ओच्छे खालैदा वास्ता आलमुला भिसी इन्दा था मुला। तिग्दा भिसम ह्राडसे म्हेला ली च्यासी गे आलमुला। तर परमेश्वरला ग्याम ज्यना लसी लोप्मुला। थेतबासेलमा इन्से रोमी ग्याल्बो कैसरदा तिरो फाबा ठीक हिन्ना कि आहिन? सुड्गो। १५ इन्से तिरो फागो कि थाफागो?” भिसी ड्योइमा, येशूसे थेनीगदेला कप्टी सेम था याड्सी, “तिग्दा एनीगदेसे डादा फसब लबारी म्हाइबा? खाइ डबल गिक भउ च्यागे” भिसी सुड्जी। १६ थेनीगदेसे येशूदा डबल गिक पिन्जी, ओच्छे येशूसे थेनीगदेदा “चु डबलरी मुबा छापदेन मिन खाल्ला हिन्ना?” भिसी सुड्मा, थेनीगदेसे “रोमी ग्याल्बो कैसरला” भिसी जोहाब पिन्जी। १७ जमाहेन्से येशूसे थेनीगदेदा “थेहड् भिसम रोमी ग्याल्बो कैसरला जति रोमी ग्याल्बो कैसरदा पिन्गो ओच्छे परमेश्वरला जति परमेश्वरदा पिन्गो” भिसी सुड्जी। चुहड्बा ताम थे:सी थेनीगदे उदेक तजी।

**सिबाग्याम सोना लबाला बारेरी ड्योइबा**

मती २२:२३-३३; लूका २०:२७-३८

१८ सिबा म्हे दो:सी आसो भिसी विश्वास लबा सदुकीगदे येशू मुबा

ग्लारी खसी चुहड् भिसी ड्योइजी,\*  
 १६“गुरु, मोशासे य्हाडदा पिन्बा ठिम  
 अन्छार खालैला ज्योज्योसे ब्याह  
 लसी कोलागदे आतनान सिजी भिसम  
 ज्योज्योला लागिरी कोलागदे तगै  
 भिसी आलेसे चाडदा ब्याह लतो:ला  
 भिसी भिबा मुला।\* २०म्हि गिकला  
 ज्योज्यो आले निस मुबा। थेबासे  
 ब्याह लजी तर कोलागदे आतनान  
 थे सिजी। २१ओच्छे पाराडसे चाडदा  
 ब्याह लजी थेएनोन कोलागदे आतनान  
 सिजी, साँजीएनोन थेहड् तसीन सिजी।  
 २२चुहड् लसी जम्मासेन पालोन पालो  
 चाडदा ब्याह लजी। ओच्छे कोलागदे  
 आतनान थेनीगदे सिजी। ओच्छे थे  
 म्रिडम्हेमेएनोन सिजी। २३थेतबासेलमा  
 डन्दा सुङ्गो, सिबाग्याम सोना लजी  
 भिसम थे म्रिडम्हेमे खजिबाला म्रिड  
 तला? तिग्दा भिसम थेनीगदे जम्मासेन  
 थे म्रिडम्हेमेदेन छ्याम ब्याह लबा  
 मुला।” २४येशूसे थेनीगदेदा “एनीगदे  
 अन्दोलरीन चीम, तिग्दा भिसम  
 एनीगदेसे परमेश्वरला बचनदेन  
 परमेश्वरला शक्तिला बारेरी घोबान  
 आरेम। २५तिग्दा भिसम सिबाग्याम  
 सोना लबा धुइरी न्ह ब्याह लला  
 न्ह ब्याह तला। तर थेनीगदे स्वर्गरी  
 मुबा स्वर्गदूतगदे हड्बान तला।  
 २६सिबाग्याम सोना लबाला बारेरी  
 अफ् भिगे भिसम परमेश्वरसे मोशादा

लुड्बा मेला फाडग्याम ‘डा अब्राहाम,  
 इसहाकदेन याकूबला परमेश्वर  
 हिन्ना’ भिसी सुङ्गी।\* २७परमेश्वर  
 मी सिबागदेला परमेश्वर आहिन,  
 तर सोबागदेला परमेश्वर हिन्ना।  
 थेतबासेलमा एनीगदेसे घोबा जम्मान  
 ताम गल्ली मुला” भिसी सुङ्गी।

### येशूसे लोप्बा जम्मान भन्दा मुल ताम

मत्ती २२:३४-४०; लूका १०:२५-२८

२८येशूसे म्हिगदेदा ज्यना लसी  
 जोहाब पिन्बा म्राङ्सी यहूदी धर्मगुरुगदे  
 न्हडला गिकसे, “गुरु, परमेश्वरसे  
 मोशादा पिन्बा ठिमरी जम्मान भन्दा  
 मुल ताम चा खजिबा हिन्ना?” भिसी  
 ड्योइजी। २९येशूसे थेदा चुहड् भिसी  
 सुङ्गी,\* “इसाएलीगदे च्यागो,  
 जम्मान भन्दा मुल ताम चा परमप्रभु  
 य्हाडला परमेश्वर गिक जे प्रभु हिन्ना।  
 ३०एसे हाडला परमप्रभु परमेश्वरदा  
 सेमहेन्से, जम्मान प्राणसे, जम्मान  
 बुद्धिसे, जम्मान शक्तिसे माया लउ।”  
 ३१ओच्छे परमेश्वरसे कुल्बा अर्गु  
 मुल ताम चा ‘एसे हाडला खिम्जेमदा  
 हाडदा हड्नोन माया लउ।’ परमेश्वरसे  
 कुल्बा मुल ताम चु भन्दा अर्गु आरे।”  
 ३२चु ताम थे:सी यहूदी धर्मगुरुसे  
 येशूदा “गुरु, हाडसे सुड्बा ताम  
 ठीक हिन्ना। परमेश्वर गिक जे मुला,

ओच्छे परमेश्वर बाहेक स्थान्दो खालै आरे।\* ३३ओच्छे परमेश्वरदान सेमहेन्सेन, जम्मान प्राणसे, जम्मान बुद्धिसे, जम्मान शक्तिसे माया लबा, ओच्छे हाडदा हड्दोन हाडला खिम्जेमदाएनोन माया लबा चा मेरी खाड्सी पिन्बा जम्मान बलिदेन बलिदानगदे भन्दा मुल ताम हिन्ना” भिसी भिजी।\* ३४थेसे होशियार तसी जोहाब पिन्बा प्राड्सी येशूसे थेदा “ए परमेश्वरला यहुल्साग्याम थारेड आरे” भिसी सुड्जी। जमाकुनुहेन्से खालैसे येशूदा तिगै ताम ड्योइबारी आँट आलनी।\*

### येशू ख्रीष्ट खाल्ला भा हिन्ना?

मत्ती २२:४१-४६; २३:१-३६;  
लूका २०:४१-४७

३५ येशूसे परमेश्वरला मन्दिररी लोप्वान लबा धुइरी चुहड् भिसी सुड्जी, “यहूदी धर्मगुरुगदेसे तिगदा थाबा पिन्बा ख्रीष्टदा दाऊद ग्लेला सन्तान भिसी भिबा? ३६ तिगदा भिसम दाऊदसेन परमेश्वरला आत्माग्याम चुहड् भिबा मुबा,  
‘परमप्रभुसे डाला प्रभुदा डाइ एला शत्रुगदेदा  
एला काड धिरी आथान्तेधोना  
ए डाला दाहिनेपट्टि चिउ’ भिसी सुड्जी।\*

३७ “दाऊद हाडसेन मी ख्रीष्टदा ‘प्रभु’ भिमाहेन्से खाहड् लसी ख्रीष्ट दाऊद ग्लेला सन्तान तला?” ओच्छे येशूसे लोप्वान ताम म्हिगदेसे सेम लसी ड्यान्जी।

### येशूसे यहूदी धर्मगुरुगदे प्राड्सी होशियार तउ भसी सुड्बा

मत्ती २३:१-३६; लूका २०:४५-४७

३८ येशूसे लोप्वान लबा धुइरी चुहड् भिसी सुड्जी, “यहूदी धर्मगुरुगदे प्राड्सी होशियार तउ। तिगदा भिसम थेनीगदे ज्यबा ज्यबा क्वान क्वान्सी कोर्बारी निबादेन बजाररी निबा धुइरी म्हिगदेसे मान लगै भिसी म्हनमुला। ३९ ओच्छे यहूदीगदे हुप तबा दिमरीदेन भोज लबा ग्लारीनोन मुल ठि म्हाइमुला। ४० थेहड् लसीन थेनीगदेसे हेम्बो सिबा मिडम्हेमेगदेला दिमनाम ब्यन्मुला। ओच्छे म्हिगदेदा उन्बाला लागिरी हेड्बा हेड्बा प्रार्थना लमुला थेहड्बा म्हिगदेसे भन ल्हानान सजाय याड्ला।”

### हेम्बो सिबा मिडम्हेमेसे पिन्बा भेटी

लूका २१:१-४

४१ येशू परमेश्वरला मन्दिररी भेटी युबा ग्लाला डाच्छापट्टि धन्छ्यासी म्हिगदेसे भेटी युबा बाकसरी भेटी युबान लबा स्हीबान मुबा। थेरी



फ्युकपो म्हिगदेसे ल्हानान टाडगा युजी। <sup>४२</sup>ओच्छे हेम्बो सिबा प्राडबो म्रिडम्हेमे गिक खसी साडबोला सिगा गिकला डबल न्ही युजी। <sup>४३</sup>जमाहेन्से येशूसे चेलागदेदा हाड मुबा ग्लारी ड्योइसी, “च्यागो, डाला ताम ड्यान्गो। भेटी युबा बाकसरी चु हेम्बो सिबा प्राडबो म्रिडम्हेमेसे स्थान्दो म्हिगदेसे भन्दा ल्हाना भेटी युबा मुला। <sup>४४</sup>तिग्दा भिसम स्थान्दो म्हिगदेसे हाडदेन छ्याम मुबा ल्हानान सम्पत्तियाम युजी। तर चु म्रिडम्हेमे प्राडबो तसीनोन हाडदेन छ्याम मुबा जति जम्मान युबा मुला” भिसी सुड्जी।

### परमेश्वरला मन्दिर नाश तला

मती २४:१-२; लूका २१:५-६

**१३** येशू परमेश्वरला मन्दिर-ग्याम थोन्सी फेप्बान लबा धुइरी चेलागदे न्हडला गिकसे “गुरु स्हीगो, चुरी गाते घ्रेन घ्रेन युडबासे स्होबा गाते जेबा दिमगदे” भिसी भिमा, <sup>२</sup>येशूसे थेदा “चु घ्रेन दिमगदेला युडबा गिकनोन बाँकी आचिना जम्मान फुप्ला” भिसी सुड्जी।

### जम्बुलिड नाश तबा धुइला चिनुगदे

मती २४:३-१४; लूका २१:७-१६

<sup>३</sup>येशू परमेश्वरला मन्दिरला क्याम्सडपट्टिला जैतून गडरी धन्छ्याबा धुइरी पत्रुस, याकूब,

यूहन्नादेन अन्द्रियास येशू मुबा ग्लारी खसी चुहड् भिसी सुटुकक ड्योइजी, <sup>४</sup>“हाडसे सुड्बा चु तामगदे खाडमा तला? ओच्छे चु तामगदे तबा धुइरी खाहड्बा चिनु म्राड्ला? उन्दा सुड्गो।”

<sup>५</sup>येशूसे थेनीगदेदा चुहड् भिसी सुड्जी, “एनीगदे होशियार तउ। खालैसे एनीगदेदा भुक्याब थालगै। <sup>६</sup>तिग्दा भिसम ल्हानान म्हिगदे डाला मिन किन्सी, ‘डानोन थार्बा पिन्बा ख्रीष्ट हिन्ना’ भिसी खला। ओच्छे ल्हानान म्हिदा भुक्याब लला। <sup>७</sup>एनीगदेसे लडाइदेन लडाइला हल्लागदे थे:ला। तसैनोन एनीगदे थालोड्गो, तिग्दा भिसम चु तनोन तो:बा हिन्ना। तर थेनोन धुइरी चा चु जम्बुलिड नाश आत। <sup>८</sup>तिग्दा भिसम म्हि यहुलला बिरोधरी म्हि यहुलनोन ओच्छे यहुल्साला बिरोधरी यहुल्सा रे:ला। खानडदमान सडगुल निला ओच्छे अनिकाल तला। चु चा कोला न्हसेला म्रिडम्हेमेदा कोला न्हबा धुइरी स्हु खबारी छ्याइबा दुख हड्बान दुख तबारी छ्याइबा हिन्ना।

<sup>९</sup>“तर थे धुइरी एनीगदे होशियार तउ। तिग्दा भिसम म्हिगदेसे एनीगदेदा अदालतरी ओच्छे यहूदीगदे हुप तबा दिमरी भोर्सी तोबा ग्याड्बा लला। ओच्छे थेनीगदेसे एनीगदेदा डादा विश्वास लबा ताम उन्बाला लागिरी अञ्चलाधीशदेन ग्लेला डाच्छापट्टि राप्पुड्ला। <sup>१०</sup>थे भन्दा डाच्छा जम्मान

यहुलदा थाबा पिन्बा समाचार थे:ना लतो:बा मुला। ११ म्हिगदेसे एनीगदेदा चुडुसी भोर्सी मुद्दा युबा धुइरी एनीगदेसे तिग पाङ्तो:ला भिसी धन्दा सुर्दा थालउ। तर थे धुइरी परमेश्वरसे तिग पाङ्गो भिबा चीम थेनोन पाङ्गो। तिगदा भिसम थे धुइरी पाङ्बा एनीगदेसे आहिन तर परमेश्वरला आत्मासे हिन्ना।\*

१२ “हाडलान ज्योज्यो आलेसे हाडलान ज्योज्यो आलेदा साइपुङ्गला। थेहङ् लसीन आबासे कोलागदेदा साइपुङ्गला ओच्छे कोलागदेसे आबा आमादा बिरोधरी लसी साइपुङ्गला। १३ ओच्छे डादा विश्वास लबासे लमा एनीगदेदा जम्मान म्हिगदेसे हेला लला। तर जुन म्हिसे जस्तोन दुख तसैनोन हाड आसितेधोना डादा विश्वास लबा आरूला थेसे थाबा याङ्गला।\*

### लोङ्बा खबा धुइ

मती २४:१५-२८; लूका २१:२०-२४

१४ “परमेश्वरला मन्दिरला चोखो ग्लारी नइबा खबा स्हे म्हाङ्गला।” चुला अर्थ चा पढब लबा म्हिसे घोगै। “थे धुइरी यहूदिया अञ्चलरी मुबा म्हिगदे गडरीक्यार यागै।\* १५ ओच्छे तलाथोरी मुबा म्हिगदे हाडला सामान

किन्बारी मार फाप्सी दिम न्हडरी थावाङ्गो।\* १६ बु चारीरी मुबागदे हाडला घ किन्बारी दो:सी दिमरी थानिउ। १७ थे धुइरी जिउ न्हीला म्निडम्हेमेदेन कोलादा इहे रूवाबा आमागदेदा भन गाते ल्हानान दुख तला! १८ चु ताम खङ्बा लारी आतगै भिसी प्रार्थना लउ। १९ तिगदा भिसम थे धुइरी तबा घेन दुख परमेश्वरसे चु जम्बुलिङ्ग स्होमाहेन्से दान्देधोना तबा आरे ओच्छे लिच्छाएनोन खाइमै तसेला आरे।\* २० चुदे परमेश्वरसे थे धुइ तुन्ना आलबा हिन्सम खालै म्हिसेन थाबा आयाङ्गसेला मुबा। तर हाडसे धम्बा म्हिगदेला लागिरी परमेश्वरसे थे धुइ तुन्ना लबा मुला।

२१ “थे धुइरी खालैसे एनीगदेदा ‘च्यागो, थाबा पिन्बा ख्रीष्ट चुरी मुला,’ अथवा ‘थेरी मुला,’ भिजी भिसम एनीगदेसे थेनीगदेला ताम पत्याब थाचउ। २२ तिगदा भिसम फट्टा ख्रीष्टगदेदेन फट्टा अगमवक्तागदे थोन्ना। ओच्छे थेनीगदेसे खम्तेधोना परमेश्वरसे धम्बा म्हिगदेदा भुक्याब लबाला लागिरी उदेकला चिनुगदेदेन उदेकला गेगदे लसी उन्ना। २३ तर एनीगदे चा होशियार लसी चिउ। डाइ एनीगदेदा जम्मान ताम डाच्छाहेन्सेन पाङ्सी पिन्बा मुला।

१३:६-११ मती १०:१७-२०; लूका १२:११-१२ १३:१३ मती १०:२२

१३:१४ दानि ६:२७; ११:३१; १२:११ १३:१५ लूका १७:३१

१३:१६ दानि १२:१; उन्बा ७:१४

### प्रभु येशू फेप्खबा धुइ

मती २४:२६-३१; लूका २१:२५-२८

२४“थे दुखला धुइ जिन्माहेन्से धिनीसे यहाल पिन्बा खलाला ओच्छे लनीला यहाल म्हाला।\*

२५जमाहेन्से मुला शक्तिगदे याडयोड तसी

सुक्र सार जम्मान ताइला।\*

२६जमाहेन्से म्हिगदेसे परमेश्वरसे पुइखबा म्हिदा घेन शक्तिदेन यहाल यहालरी खसुरी खबान लबा म्हाइला।\*

२७ओच्छे थेसे स्वर्गदूतगदेदा जम्बुलिङदेन मुला जम्मान ग्लारी पुइला। जमाहेन्से थे स्वर्गदूतगदेसे परमेश्वरसे धम्बा जम्मान म्हिगदेदा ग्ला गिकरी पोप लला।”

### अञ्जीरला दोड च्यासी लोप्तो:बा ताम

मती २४:३२-३५; लूका २१:२६-३३

२८येशूसे थेनीगदेदा दो:सी चुहड् भिसी सुड्जी “एनीगदेसे अञ्जीरला दोडदा च्यासी थेग्याम तिगै ताम लोप्पो। थेला हाँगागदेरी भा भुमैछ्याम छेप्बा छबा ला वाड्जी भिसी एनीगदेसे था याड्मुला। २९थेहड् लसीन डाइ पाड्बा तामगदे तबा म्हाइमाहेन्से परमेश्वरसे पुइखबा म्हि खबा धिन

खसी जिन्जी भिबा ताम एनीगदेसे था याड्गो। ३०च्यागो, एनीगदेसे डाला ताम ड्यान्गो, चु जम्मान ताम पूरा आततेधोना दान्देला म्हिगदे आसि। ३१मुदेन जम्बुलिङ म्हासी निसैनोन डाला बचन खाइमै आम्हा।

### होशियार तसी चितो:बा

मती २४:३६-४४

३२“थे दुखला धिनदेन धुइ खाइमा खला भिसी स्वर्गदूतदाएनोन था आरे ओच्छे डा परमेश्वरला भ्रादाएनोन था आरे। थे ताम परमेश्वर आबादा जे था मुला। ३३थेतबासेलमा एनीगदे होशियार तसी छोर्सी चिउ। ओच्छे प्रार्थना लउ, तिगदा भिसम थे धुइ खाइमा खला भिसी एनीगदेदा था आरे।

३४“चु ताम चा मालिकसे हाडला दिम च्याबा म्हिदा क्यारमार ज्यना लसी च्यागो, ओच्छे नोकरगदेदाएनोन हाड हाडला गे ज्यना लसी लउ भिसी कुल्सी हाड चा विदेशरी निबा हड्बान हिन्ना।\* ३५थेतबासेलमा एनीगदे छोर्सी चिउ, तिगदा भिसम मालिक खाइमा खला भिसी एनीगदेदा था आरे। थे ड्यसे खखम्ला, म्हुन गुडरी खखम्ला, नागा क्राबा धुइरी खखम्ला, स्थहोरीनोन खखम्ला खजिबै धुइरीनोन

१३:२४ यशै १३:१०; इज ३२:७; योए २:१०, ३१; ३:१५; उन्बा ६:१२

१३:२५ यशै ३४:४; योए २:१०; उन्बा ६:१३ १३:२६ दानि ७:१३; उन्बा १:७

१३:३४ लूका १२:३६-३८

थे खखम्ला। ३६तर एनीगदेदा था आपिन्ना तिक्खुरीन खमा एनीगदेदा म्हेर्सी चिबा स्याप्ला। ३७थेतबासेलमा एनीगदे छोर्सी चिउ, डाइ एनीगदेदा पाड्बा चु ताम जम्मादान पाड्बा मुला।”

### येशूदा साइबारी सल्लाह लबा

मती २६:१-५; लूका २२:१-२;

यूहन्ना ११:४५-५३

१४ मिश्र यहुल्साग्याम फेसी खबा धिनदा ढन्सी धड्बा चाडदेन खमीर आयुना गेड चसी धड्बा चाडला न्हीरे डाच्छाकुनु परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसे येशूदा चुड्सी साइबारी दाउ च्यासी भ्रमुबा।\* ३तिग्दा भिसम “यहाडला चाडला धुइरी चा चुड्बारी आत। चाडला धुइरी चुड्जी भिसम म्हिगदेसे हुल दडगा लला” भिसी थेनीगदे हाड हाड न्हडरी ताम लजी।

### येशूदा अत्तर फोर्बा

मती २६:६-१३; यूहन्ना १२:१-८

३येशू बेथानिया भिबा नाम्साला कोरे खबा सिमोनला दिमरी सोल छयोइबान लबा धुइरी म्प्रिडम्हेमे गिकसे सिङ्गमरमरला ताडरी ल्हानान महँगो खाल्ला अत्तर भसी खजी। थे अत्तर जटामसी भिबा दोडला टाग्याम स्होबा

मुबा। थेसे थे ताडनोन थिसी येशूला थोबोरी युजी।\* ४थेसे चुहड् लबा म्प्राड्सी स्थान्दो म्हिगदेसे नाआखम्ना “चुदे महँगो अत्तर ओहड्ङनोन तिग्दा खेरो भ्याड्बा” भिसी हाड हाड न्हडरी ताम लजी। ५बरु चु चुड्सी खबा टाडगा प्राडबोगदेदा पिन्सै तसेला। चु चुड्सम ग्यार्जा सोम म्हुइला डबल खसेला मुबा” चुहड् लसी थे म्प्रिडम्हेमेदा थेनीगदेसे बड्जी।

६तर येशूसे थेनीगदेदा चुहड् भिसी सुड्जी “थालउ, एनीगदेसे तिग्दा चुदा कचकच लबा? चुसे मी डाला लागिरी ज्यबा गे लबा मुला। ७च्यागो, प्राडबोगदे मी सदन एनीगदेदेन छ्याम तला। ओच्छे एनीगदेसे थेनीगदेदा खजिबै धुइरी हो लखम्ला। तर डा मी सदन एनीगदेदेन छ्याम आत।\* ८चु म्प्रिडम्हेमेसे जे लखम्जी, थेनोन थेसे लजी। डाला ल्हुइ धुर्सारी थान्बाला लागिरी चुसे अत्तर फोर्सी डाच्छान ठीक लबा मुला। ९च्यागो, एनीगदेसे डाला ताम ड्यान्गो, जम्बुलिडला जुन जुन ग्लारी थार्बा पिन्बा समाचार थे:ना लला, थे, थे ग्लारी चु म्प्रिडम्हेमेसे लबा गे ढन्बाला लागिरी थेला ताम लला।”

### यहूदा इस्करियोतसे लबा सल्लाह

मती २६:१४-१६; लूका २२:३-६

१०जमाहेन्से येशूला च्युक न्ही चेलागदे न्हडला यहूदा इस्करियोत

भिबा चेला गिक परमेश्वरला मन्दिररी पूजा लबा मुल म्हिगदे मुबा ग्लारी निसी येशूदा चुड्सी पिन्ना भिसी सल्लाह लजी। <sup>११</sup>चु ताम थेःसी परमेश्वरला मन्दिररी पूजा लबा मुल म्हिगदे ल्हानान ताड्सी यहूदा इस्करियोतदा टाडगा पिन्ना भिसी कबुल लजी। थे धुइहेन्से थेसे येशूदा चुड्सी पिन्बाला लागिरी दाउ च्यासी भ्रजी।

### येशूसे भोज तयार लउ भिसी कुल्बा

मत्ती २६:१७-२५;

लूका २२:७-१४, २१-२३;

यूहन्ना १३:२१-३०

<sup>१२</sup>खमीर आयुना गेड चसी धड्बा चाडला शुरुला धिनकुनु यहूदीगदेसे ग्यु बोगो फुल्लोःमुबा। येशूला चेलागदेसे येशूदा “हाडला लागिरी डन्से मिश्र यहुल्साग्याम फेसी खबा धिनदा ढन्सी धड्बा चाडला भोज खानड तयार लउ?” भिसी ड्योइजी।

<sup>१३</sup>येशूसे हाडला चेला न्हीदा “एनीगदे शहररी निउ, एनीगदेसे थेरी दर्बुडरी क्युइ पुइसी निबा म्हि गिकदा स्याप्ला। थेनोन म्हिला लिच्छा लिच्छा निउ। <sup>१४</sup>ओच्छे थे म्हि जुन दिमरी वाड्ला, थेनोन दिमला धनीदा ‘डाइ डाला चेलागदेदेन छ्याम चिसी मिश्र यहुल्साग्याम फेसी खबा धिनदा ढन्सी धड्बा चाडला भोज चबा कोठा खानड मुला?’ भिसी गुरुसे ड्योइबा

मुला भिउ। <sup>१५</sup>एनीगदेदा थेसे डाच्छान जेना लसी थान्बा तलाथोला घेन कोठा उन्सी पिन्ना। एनीगदेसे थेरीन यहाडला लागिरी भोज ठीक लउ” भिसी कुल्जी।

<sup>१६</sup>जमाहेन्से चेलागदे शहररी निबान लबा धुइरी येशूसे सुड्बा हड्बानोन स्याप्ली। ओच्छे थेनीगदेसे थेरीन मिश्र यहुल्साग्याम फेसी खबा धिनदा ढन्सी धड्बा चाडला भोज ठीक लजी। <sup>१७</sup>ओच्छे ड्यसे तमाहेन्से येशू हाडला च्युक न्ही चेलागदेदेन छ्याम फेप्खजी। <sup>१८</sup>भोज सोल्बान लबा धुइरी येशूसे हाडला चेलागदेदा “च्यागो, एनीगदेसे डाला ताम ड्यान्गो, एनीगदे न्हडला डादेन छ्यामनोन चबा गिकसे डादा म्हिगदेला यारी जिम्मा पिन्ना” भिसी सुड्जी।\*

<sup>१९</sup>चु ताम थेःमाहेन्से चेलागदेदा दुख ड्हम्सी, “थे म्हि डानोन हिन्ना?” भिसी पालो पालो लसी येशूदा ड्योइजी।

<sup>२०</sup>येशूसे थेनीगदेदा “एनीगदे च्युक न्ही न्हडला गिकसे खार्बारी डादेन छ्यामनोन गेड तुइसी चबान मुला। <sup>२१</sup>परमेश्वरला बचनरी भिबा हड्बानोन परमेश्वरसे पुइखबा म्हि मी सिनोन तोःला। तर जुन म्हिसे परमेश्वरसे पुइखबा म्हिदा चुड्सी म्हिला यारी जिम्मा पिन्ना, थेसे परमेश्वरग्याम खाहड्बा लोड्बा खबा सजाय याड्ला। बरु थे मी न्हनोन आन्हबा हिन्सम ज्यबा तसेला मुबा” भिसी सुड्जी।



### प्रभु भोज (१४:२६)

#### प्रभु भोज

मत्ती २६:२६-३०; लूका २२:१५-२०;  
१ कोरिन्थी ११:२३-२५

२२ थेनीगदेसे चबान लबा धुइरी येशूसे यारी गेड किन्सी परमेश्वरदा धन्यवाद पिन्बान प्रार्थना लजी। ओच्छे गेड क्युइसी चेलागदेदा पिन्बान, “ना! चु डाला लहुइ हिन्ना” भिसी सुइजी। २३ जमाहेन्से येशूसे खोरेरी मुबा अडगुरला निडगु थोसी परमेश्वरदा धन्यवाद पिन्सी चेलागदेदा पिन्जी। ओच्छे थेनीगदेसे थे खोरेग्याम थुइजी। २४ जमाहेन्से येशूसे थेनीगदेदा “चु लहानान म्हिगदेला लागिरी बगब तबा डाला का हिन्ना। डाला कानोन परमेश्वरसे म्हिगदेदा लबा छार कबुल हिन्ना।” \* २५ च्यागो, एनीगदेसे डाला ताम ड्यान्गो, परमेश्वरला यहुल्सारी अडगुरला छार निडगु थुइबा धुइ

आखतेधोना डाइ चु अडगुरला निडगु आथुइ” भिसी सुइजी।” २६ ओच्छे थेनीगदे परमेश्वरदा धन्यवादला व्हाइ गिक गोसी जैतून भिबा गडरीक्यार भ्रजी।

#### पत्रुससे येशूदा खलाला भिसी पाइबा ताम

मत्ती २६:३१-३५; लूका २२:३१-३४;  
यूहन्ना १३:२६-३८

२७ येशूसे हाडला चेलागदेदा चुहइ भिसी सुइजी, “एनीगदे जम्मासेन डादा खलासी यार्ला। तिगदा भिसम परमेश्वरला बचनरी

“डाइ गोठालोदा साइला

ओच्छे ग्युगदे ससा बडबड तसी यार्ला” भिसी भिबा मुला। \*

२८ तर डादा सिबाग्याम सोना लमाहेन्से एनीगदे भन्दा डाच्छा डा गालीलरी निला।” \*

२६ येशूसे चुहड्ड सुड्मैछ्याम पत्रुससे येशूदा “जम्मासेन हाडदा ख्लासी यासैनोन डाइ हाडदा खाइमै आख्ला” भिसी भिजी।

३० येशूसे पत्रुसदा “च्यागो, एसे डाला ताम ड्यान्गो, न्हडगर स्थहोरी न्हरीरम नागा क्राबा भन्दा डाच्छा एसे सोमेरेमधोना डा येशूदेन छ्याम भ्रबा म्हि हिन्नोन आहिन भिसी भिला” भिसी सुड्जी।

३१ तर पत्रुससे, “आहिन, डा हाडदेन छ्याम सितोःसैनोन डाइ हाडदा आख्ला” भिसी भिजी। ओच्छे स्थहान्दो चेलागदेसेनोन थेहड्डनोन भिजी।

### गेतसमनी भिबा ग्लारी येशूसे लबा प्रार्थना

मत्ती २६:३६-४६, लूका २२:३६-४६

३२ जमाहेन्से थेनीगदे गेतसमनी भिबा ग्लारी फेप्जी। ओच्छे येशूसे हाडला चेलागदेदा “डाइ प्रार्थना लतेधोना एनीगदे चुरीन चिउ” भिसी सुड्जी। ३३ येशूसे पत्रुस, याकूबदेन यूहन्नादा हाडदेन छ्याम भोजी। ओच्छे येशूला सेम भोल्सी ल्हानान दुख तबारी छ्याइजी। ३४ ओच्छे येशूसे थेनीगदेदा “डाला सेम क्रोसी डा सिबा तेबान तबा मुला। थेतबासेलमा एनीगदे चुरीन डा हड्ड लसी छोर्सी चिउ” भिसी सुड्जी। ३५ जमाहेन्से येशू जजाकी क्याथाड फेप्सी सरी रल्लुप तसी, “डाथोरी खबारी छ्याइबा चु

दुख तसम डाइ नाआतोःगै” भिसी प्रार्थना लबारी छ्याइजी। ३६ येशूसे चुहड्ड भिसी प्रार्थना लजी, “आबा, हाडसे लआखम्बा ताम तिगै आरे, थेतबासेलमा तसम डादा चु दुखग्याम फेसी पिन्गो। तर डाइ म्हन्बा अन्छार आहिन, हाडसे म्हन्बा अन्छार तगै।”

३७ जमाहेन्से येशू हाडला चेला सोम मुबा ग्लारी दोःसी फेप्खमा थेनीगदे म्हेर्सी चिबा स्याप्जी। येशूसे पत्रुसदा चुहड्ड भिसी सुड्जी, “सिमोन, तिग ए म्हेर्सी चिबा? ए घण्टा गिक सुत्तै छोर्सी चिआखम्नी? ३८ दाहेन्से एनीगदे पापरी फसब आतबाला लागिरी छोर्सी प्रार्थना लसी चिउ। च्यागो, एनीगदेला आत्मा मी तयार मुला, तर लहुइ चा कमजोर मुला।”

३९ येशू दोःसी तिरेम थे ग्लारी फेप्सी डाच्छाला हड्ड लसीन प्रार्थना लजी। ४० ओच्छे चेलागदे मुबा ग्लारी दोःसी फेप्खमा चेलागदे म्हेर्सी चिबा स्याप्जी। म्हेर्बा खबासे लमा थेनीगदेसे मीनोन ठोड्डआखम्नी, ओच्छे तिग भितोःबा थे थेनीगदेदा था आतनी।

४१ येशू सोमेरेमला पालोरी फेप्खसी चेलागदेदा चुहड्ड भिसी सुड्जी, “अभन एनीगदे म्हेर्सी ब्लपबा न्हबान मुला? दाहेन्से म्हेर्बा धुइ निजी। च्यागो, परमेश्वरसे पुडखबा म्हिदा चुड्डी पापीगदेला यारी जिम्मा पिन्बा धुइ तसी जिन्बा मुला। ४२ रेःगो, निइ! च्यागो, डादा स्थहान्दोला यारी जिम्मा पिन्बा म्हि खसी जिन्बा मुला।”

## येशूदा चुङ्बा

मत्ती २६:४७-५६;

लूका २२:४७-५३; यूहन्ना १८:३-१२

४३ येशूसे चु ताम सुङ्मैछ्याम च्युक न्ही चेलागदे न्हडला यहूदा भिबा चेलादेन छ्याम कडीदेन तरवार थोबा म्हिला हुल धोखजी। थेनीगदेदा परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदे ओच्छे यहूदी गन्बागदेसे पुइखबा मुबा। ४४ येशूदा चुङ्बारी खबा म्हिगदेदा यहूदासे “जुन म्हिदा डाइ च्योक लला, थेनोन येशू हिन्ना, थेदा चुङ्सी क्युर लसी भोर्गी” भिसी पाङ्बा मुबा। ४५ ओच्छे यहूदा येशू मुबा ग्लारी सरासर निसी, “गुरु” भिसी येशूदा च्योक लजी। ४६ जमाहेन्से थेनीगदेसे येशूदा चुङ्सी खीसी भोर्गी। ४७ तर थेरी राप्सी चिबा गिकसे तरवार ते:सी परमेश्वरला मन्दिररी पूजा लबा मुल म्हिला नोकरला नाब्यड च्वाट्टन थाजी।

४८ येशूसे थेनीगदेदा “एनीगदे तिग्दा यहोदा चुङ्बारी खबा हङ् लसी कडी तरवार थोसी खबा? ४९ खाइ, डाइ एनीगदेला गुडरी म्हिगदेदा धिन धिननोन परमेश्वरला मन्दिररी लोप्सी चिबा धुइरी एनीगदेसे डादा आचुङ्नी। तर परमेश्वरला बचनरी भिबा अन्छार पूरा तगै भिसीन

चुहङ् तबा हिन्ना” भिसी सुङ्जी।\* ५० जमाहेन्से चेलागदे जम्मासेन येशूदा ख्लासी यार्जी।

५१ तर सुतिला क्वान क्वान्बा भ्योन गिक येशूला लिच्छा लिच्छा भ्रवान मुबा। थेनीगदेसे थेदाएनोन चुङ्जी। ५२ ओच्छे थेनीगदेसे थेदा चुङ्मा थेला क्वान जे स्याप्जी। तर थे म्हि हाडला क्वाननोन ख्लासी लिगन्डीन यार्जी।

## येशूदा यहूदीगदेला सभारी भोर्बा

मत्ती २६:५७-६८;

लूका २२:५४-५५, ६३-७१;

यूहन्ना १८:१३-१४, १६-२४

५३ जमाहेन्से येशूदा परमेश्वरला मन्दिररी पूजा लबा मुल म्हि मुबा ग्लारी भोर्गी। थेरी पूजा लबा म्हिगदेदेन यहूदी गन्बागदे ओच्छे यहूदी धर्मगुरुगदेएनोन पोप तबा मुबा। ५४ ओच्छे पत्रुस चा येशूला जजाकी लिच्छा लिच्छा निसी परमेश्वरला मन्दिररी पूजा लबा मुल म्हिला दिमला खाङ्गाधोना निजी, ओच्छे पालेगदेदेन छ्याम मे दूसी चिजी।

५५ जमाहेन्से परमेश्वरला मन्दिररी पूजा लबा मुल म्हिगदेदेन यहूदी सभाला जम्मान म्हिगदेसे येशूदा साइबाला लागिरी प्रमाण म्हाइबारी छ्याइजी। तर थेनीगदेसे तिगै प्रमाण आस्याप्नी। ५६ थेरी ल्हानान म्हिगदेसे



येशूला बिरोध लसी लुसीला ताम लजी। तर खालैला ताम आढिकनी।

५७ जमाहेन्से कोइ कोइ म्हिगदे रेःसी येशूला बिरोध लबान चुहड् भिसी लुसीला ताम पाड्बारी छ्याइजी, ५८ “चु म्हिसे ‘डाइ म्हिसे स्होबा चु परमेश्वरला मन्दिरदा फुप्सी सोमरेरीन म्हिसे आस्होबा परमेश्वरला मन्दिर स्होला भिसी चुसे भिबा डन्से थेःबा मुला।’ ”\* ५९ ओते लसैनोन थेनीगदेला ताम आढिकनी।

६० परमेश्वरला मन्दिररी पूजा लबा मुल म्हिगदे जम्मान म्हिगदेला डाच्छापट्टि राप्सी येशूदा “एसे तिगदा जोहाब आपिन्बा? चु म्हिगदेसे एला बिरोधरी पाड्बा तामला बारेरी एदा तिगै पाड्सेला आरे?” भिसी ड्योइजी। ६१ तर येशूसे तिगै जोहाब आपिन्ना कुटिसी स्थहूजी। परमेश्वरला मन्दिररी पूजा लबा मुल म्हिसे येशूदा दोःसी, “तिग ए परमेश्वरला भा थार्बा पिन्बा ख्रीष्ट हिन्ना?” भिसी ड्योइमा, ६२ “डा हिन्ना, परमेश्वरसे पुइखबा म्हिदा हाडनीसे शक्तिशाली परमेश्वरला दाहिने छ्यापट्टि चिबादेन स्वर्ग्याम खसुरी खबान लबा म्राड्ला” भिसी येशूसे सुड्जी।\*

६३ चु ताम थेःसी परमेश्वरला मन्दिररी पूजा लबा मुल म्हिसे हाडला क्वान ढेबान, “दाहेन्से यहाडदा अर्गु प्रमाण तिगदा तोःजी?” भिसी भिजी।

६४ “चुसे हाडसे हाडदान परमेश्वर स्होसी पाड्बा ताम यहाडसे थेःनोन थेःजी, दाहेन्से एनीगदेला तिग बिचार मुला?” भिमा, थेरी मुबा जम्मान म्हिगदेसे “चु म्हि साइनोन तोःबा म्हि हिन्ना” भिसी भिजी।\*

६५ थेरी मुबा म्हिगदे न्हडला कोइ कोइ म्हिगदेसे येशूदा थो स्वाबारी छ्याइजी। ओच्छे येशूला मी घप्सी तोबान, “लु, अगमवाणी पाड्गो” भिसी भिजी। जमाहेन्से थेरी मुबा स्थहान्दो सिपाहीगदेसेनोन येशूदा तोबारी छ्याइजी।

### पत्रुससे डा येशूला चेला आहिन भिसी पाड्बा

मती २६:६९-७५; लूका २२:५६-६२;  
यूहन्ना १८:१५-१८, २५-२७

६६ पत्रुस खाडगारी चिबान लमा परमेश्वरला मन्दिररी पूजा लबा मुल म्हिला नोकरस्या गिक पत्रुस मुबा ग्लारी खजी। ६७ ओच्छे पत्रुसदा मे दूबान लबा म्राड्सी थे नोकरस्यासे “एएनोन नासरतला येशूदेन छ्यामनोन मुबा आहिन?” भिसी ड्योइमा, ६८ “एसे खाल्ला ताम लबा, डादा तिगै था आरे” भिसी पत्रुस खाडगाला म्रापरीक्यार निजी। थे धुइरी नागा क्राजी।

६९ पत्रुसदा म्रापरी चिबान लबा म्राड्सी दोःसी थे नोकरस्यासे

स्थहान्दो म्हिगदेदा “चु म्हि मी येशूला चेला हिन्ना” भिसी भिजी।<sup>७०</sup> पत्रुससे दोःसी आहिन भिसी भिजी। जजाकी लिच्छा दोःसी थेरी राप्सी चिबा म्हिगदेसे पत्रुसदा “पक्कान, ए येशूला चेला हिन्ना। तिग्दा भिसम ए गालीलला म्हि हिन्ना” भिसी भिजी।

<sup>७१</sup> पत्रुससे दोःसी, “डाइ लुसीला ताम पाड्बा हिन्सम परमेश्वरला सजाय डाथोरी खइ भिसी घान फाबान हाडसे भिबा म्हिदा डाइ डोसेबा आरे” भिसी भिजी।

<sup>७२</sup> पत्रुससे थेहड् भिमैछ्याम दोःसी नागा क्राजी। “न्हीरेम नागा क्राबा भन्दा डाच्छा सोमरेमधोना एसे डादा डोसेबान आरे भिला” भिसी येशूसे सुड्बा ताम ढन्सी पत्रुस घवाँ घवाँ क्राजी।

## येशूदा पिलातसला डाच्छापट्टि भोर्बा

मत्ती २७:१-२, ११-२६;

लूका २३:१-३, १८-२५;

यूहन्ना १८:२८-४०; १९:१६

**१५** स्थहोरीन परमेश्वरला मन्दिररी पूजा लबा मुल म्हिगदेदेन यहूदी गन्बागदे ओच्छे थेरी मुबा यहूदी धर्मगुरुगदेदेन छ्याम जम्मान म्हिगदे सल्लाह लजी। ओच्छे थेनीगदेसे येशूदा खीसी पिलातस भिबा रोमी अञ्चलाधीश मुबा ग्लारी भोर्सी जिम्मा पिन्जी।

<sup>२</sup> जमाहेन्से पिलातससे येशूदा “तिग ए यहूदीगदेला ग्ले हिन्ना?” भिसी ड्योइमा, येशूसे “थे मी हाडसेन सुड्बा मुला” भिसी जोहाब पिन्जी।<sup>३</sup> परमेश्वरला मन्दिररी पूजा लबा मुल म्हिगदेसे येशूदा ल्हानान तामरी दोष लबाला लबान लजी।<sup>४</sup> थेतबासेलमा पिलातससे येशूदा दोःसी, “एला तिगै जोहाब आरे? च्यागो, थेनीगदेसे एला बिरोध लसी एदा ल्हानान दोष लबान मुला” भिसी भिजी।<sup>५</sup> तर येशूसे तिगै जोहाब आपिन्नी। चु म्राड्सी पिलातस उदेक तजी।

<sup>६</sup> मिश्र यहुल्साग्याम फेसी खबा धिनदा ढन्सी धड्बा चाडला धुइरी पिलातससे म्हिगदेसे धम्बा भयाल्खानरी मुबा म्हि गिकदा पुइमुबा।<sup>७</sup> थे धुइरी बारब्बा भिबा आज्यबा गे लबा म्हि गिक भयाल्खानरी मुबा। थेसे आन्दोलनरी म्हि साइबा मुबा।<sup>८</sup> ओच्छे म्हिला हुल खसी पिलातसदा “निबा दिडरी हड् चु पाल्सेनोन भयाल्खानरी मुबा म्हि गिकदा पुइसी पिन्गो” भिसी भिजी।<sup>९</sup> म्हिगदेसे चुहड् भिमाहेन्से पिलातससे “डाइ चु यहूदीगदेला ग्लेदा र्ल्लासी पिन्गै भिसी एनीगदेसे म्हन्बा मुला?” भिसी ड्योइजी।<sup>१०</sup> तिग्दा भिसम परमेश्वरला मन्दिररी पूजा लबा मुल म्हिगदेसे डाह लसी येशूदा डा मुबा ग्लारी भबा हिन्ना भिबा ताम पिलातसदा था मुबा।

<sup>११</sup> तर परमेश्वरला मन्दिररी पूजा लबा मुल म्हिगदेसे स्थहान्दो म्हिगदेदा

थीसी, “येशूदा आहिन, बारब्बादा रूलासी पिन्गी!” भिपुङ्जी। १२ओच्छे पिलातससे “चु यहूदीगदेला ग्ले भिबा म्हिदा डाइ तिग लउ?” भिसी ड्योइमा, १३“चुदा क्रुसरी टाँगब लसी साइगो!” भिसी यहूदीगदे क्रिड्बारी छ्याइजी।

१४पिलातससे “तिगदा? चुसे थेहड्बा आज्यबा गे तिग लबा मुला?” भिसी ड्योइजी।

तर थेनीगदेसे भन क्रिड्बान, “चुदा क्रुसरी टाँगब लसी साइगो” भिसी भिजी।

१५पिलातसदा थे म्हिला हुलदा ताड्ना लबा सेम मुबा। थेतबासेलमा थेसे बारब्बादा पुइजी। तर येशूदा चा कोर्सासे तोसी क्रुसरी टाँगब लसी साइबाला लागिरी रोमी सिपाहीगदेदा जिम्मा पिन्जी।

### सिपाहीगदेसे येशूदा खिसी लबा

मत्ती २७:२७-३१; यूहन्ना १९:२-३

१६जमाहेन्से सिपाहीगदेसे येशूदा सिपाहीगदेला हाकिम चिबा प्रेटोरियन भिबा दिम न्हडरी भोर्जी। ओच्छे जम्मान सिपाहीगदेदा ड्योइजी। १७ओच्छे थेनीगदेसे ग्लेला हड्बान वाला वाला पिङ्गै छोनना क्वान क्वान्सी पिन्जी। ओच्छे थेनीगदेसे पुजुला फेटा स्होसी येशूदा थोइसी

पिन्जी। १८जमाहेन्से थेनीगदेसे येशूदा “लास्सो यहूदीगदेला ग्ले, फयाफुल्ला” भिबान सलाम लजी। १९ओच्छे थेनीगदेसे येशूदा थो स्वाबान माला कडीसे थोबोरी तोसी फया लजी। २०थेहड् लसी येशूदा खिसी लमाहेन्से थेनीगदेसे थे वाला वाला पिङ्गै छोनना क्वान स्युसी पिन्जी। ओच्छे येशूदा थेलान क्वान क्वान्सी क्रुसरी टाँगब लसी साइबारी भोर्जी।

### येशूदा क्रुसरी टाँगब लबा

मत्ती २७:३२-४४; लूका २३:२६-४३;

यूहन्ना १९:१७-२७

२१थेनीगदेसे येशूदा भोर्बान लबा धुइरी कुरेनी भिबा ग्लाला सिमोनदा खबान लबा स्याप्जी। थे अलेक्जेन्डरदेन रूफसला आबा मुबा। जमाहेन्से सिपाहीगदेसे थेदा कर लसी येशूला क्रुस पुइपुङ्जी।\* २२ओच्छे थेनीगदेसे येशूदा गलगथा भिबा ग्लारी भोर्जी। गलगथा भिबा चा “खप्परला ग्ला” हिन्ना। २३गलगथारी धोमाहेन्से थेनीगदेसे येशूदा अडगुरला निङ्गुरी लठेब तबा मन युसी पिन्जी। तर येशूसे थे आसोल्नी। २४जमाहेन्से थेनीगदेसे येशूदा क्रुसरी टाँगब लजी। ओच्छे थेनीगदेसे येशूला क्वान भो लसी खाल्दा खजिबा परब तबा चीम भिसी हाड हाड न्हडरी चिट्ठा युजी।\*

१५:२३ “लठेब तबा मन” ग्रीक बाइबलरी चुदा मूर् भिसी भिबा मुला।

१५:२१ रोमी १६:१३ १५:२४ भजन २२:१८

२५ येशूदा कुसरी टाँगब लबा धुइरी स्थोला नौ बजब तमुबा।  
 २६ येशूदा दोष लबा तामरी “चु यहूदीगदेला ग्ले” भिसी भ्रिबा मुबा।  
 २७ थेनीगदेसे येशूदा कुसरी टाँगब लबा धुइरी य्हो न्हीदाएनोन गिकदा दाहिनेपट्टि गिकदा देब्रेपट्टि कुसरी टाँगब लजी।  
 २८ परमेश्वरला बचनरी भ्रिबा ताम चुहड् लसी पूरा तजी, “थेदा अपराधीगदेदा हड् नोन लजी।” † \*

२९-३० थेग्याम भ्रबा म्हिगदेसे थोबो य्होड्बान, “लु, परमेश्वरला मन्दिर फुप्सी सोमरेरीन दोःसी स्थोला भिबा म्हि दान्दे एसे हाडसे हाडदान जोगब लउ, ओच्छे कुसग्याम मार फाप्पो” भिसी येशूदा खिसी लजी।  
 ३१-३२ थेहड् लसीन परमेश्वरला मन्दिररी पूजा लबा मुल म्हिगदेदेन यहूदी धर्मगुरुगदेसेएनोन थेनीगदे हाड हाड न्हडरी, “चुसे स्थहान्दोदा चा जोगब लखम्जी। तर हाडसे हाडदा चा जोगब लआखम्नी। चु इस्राएलीगदेला ग्ले थार्बा पिन्बा ख्रीष्ट कुसग्याम मार फाप्सी खगै, ओच्छे जे य्हाडसे थेदा विश्वास लला!” भिसी ठट्टा लजी। ओच्छे येशूदेन छयाम कुसरी टाँगब लबा म्हिगदेसेनोन येशूदा खिसी लजी।

## येशू सिबा

मती २७:४५-५६; लूका २३:४४-४६;

यूहन्ना १९:२८-३०


३३ धिनना बाह बजेहेन्से तीन बजेधोना य्हुल्सा नाडनोन धोपधोप तजी। ३४ ड्यसे तीन बजेरीक्यार येशूसे घेन काइरी क्रिड्बान, “इलोइ इलोइ लामा सबखथनी?” भिसी सुड्जी। चु भिबा चा “डाला परमेश्वर, डाला परमेश्वर, हाडसे डादा तिग्दा ख्लाबा?” भिबा हिन्ना।\* ३५ चुहड् लसी क्रिड्बा म्राड्सी थेरी राप्सी चिबागदे न्हडरी कोइ कोइसे “च्यागो, चुसे मी एलियादा गा ड्योइबा चीम” भिसी भिजी। ३६ ओच्छे थेनीगदे न्हडरी गिकसे चा यासी निसी अडगुरला कम्बा निडगुरी क्वानगेन ब्लुम्सी माला कडीरी खीसी येशूदा ख्वामा, “भ्रान्गो, भ्रान्गो, चुदा एलिया खसी कुसग्याम मार तेःला वा? च्यागे” भिसी भिजी।\*

३७ जमाहेन्से घेन काइरी क्रिड्सी येशूला सा निजी। ३८ थेनोन धुइरी परमेश्वरला मन्दिर न्हडरी मुबा पर्दा हाडनोन तोरहेन्से मारधोना परख्ले न्ही तसी ठेजी।\* ३९ चुहड् लसी येशूला सा निबा म्राड्सी थेरी कुसला डाच्छापट्टि राप्सी चिबा रोमी कप्तानसे “चु मी

१५:२८ चु पदला ताम ल्हानान हड्बा ग्रीक बाइबलरी भ्रिबा आरे।

१५:२८ यशै ५३:१२ १५:२९-३० भजन २२:७; १०९:२५; मर्कू १४:५८; यूह २:१९

१५:३४ भजन २२:१ १५:३६ भजन ६९:२१ १५:३८ प्रस्था २६:३१-३३



परमेश्वरला मन्दिर न्हडरी मुबा पर्दा ढेजी (१५:३८)

साँच्चिन परमेश्वरला भानोन चीम”  
भिसी भिजी।

४० थेरी कोइ कोइ म्रिडम्हेमेगदेसे थारेङ्ग्याम च्यासी चिबा मुबा। थेनीगदे न्हडरी मरियम मग्दलिनी, जजा याकूबदेन योसेफला आमा मरियम ओच्छे सलोमी मुबा। ४१ येशू गालीलरी मुबा धुइरी थेनीगदे येशूला लिच्छा लिच्छा भ्रसी येशूला सेवा लमुबा। ओच्छे थेरी यरूशलेमधोना येशूदेन छ्याम खबा ल्हानान म्रिडम्हेमेगदेएनोन मुबा।\*

येशूदा धुर्सारी थान्बा

मत्ती २७:५७-६१; लूका २३:५०-५६;

यूहन्ना १६:३८-४२

४२ चु धिन बलपबा न्हबा धिनना डाच्छाकुनु मुबा। ४३ थे धिनकुनु ड्यसे अरिमाथिया भिबा शहरला योसेफ भिबा म्हि आलोङ्गान पिलातस मुबा ग्लारी निसी येशूला लास हीजी। थे योसेफ यहूदी सभाला मुल सदस्या मुबा। थेएनोन परमेश्वरसे शासन लबा धुइ खला भिसी भ्रान्सी चिबा मुबा।

४४ येशू सिजी भिबा ताम थे:सी पिलातस उदेक तजी। ओच्छे थेसे रोमी कप्तानदा हाड मुबा ग्लारी इयोइसी येशू साँच्चिन सिबा हिन्ना कि आहिन भिसी इयोइबा छाबा लजी। ४५ रोमी कप्तानसे येशू साँच्चिन सिबा हिन्ना भिमाहेन्से पिलातससे येशूला लास योसेफदा भोर्बारी पिन्जी। ४६ योसेफसे ज्यबा खाल्ला सुतिला क्वान ग्लुसी भजी। ओच्छे येशूला लास क्रुसग्याम मार ते:सी थे सुतिला क्वानरी रिल्जी। थेग्याम येशूला लासदा भोर्सी युडबाला पहरारी ठ्वाइसी स्होबा धुर्सा न्हडरी भोर्सी थान्जी। जमाहेन्से युडबा ब्लिड्बान भसी धुर्साला म्पारी थान्जी। ४७ मरियम मग्दलिनीदेन योसेफला आमा मरियमसे येशूला लास थान्बा ग्ला च्यासी चिमुबा।

### येशू सिबाग्याम सोबा

मत्ती २८:१-८; लूका २४:१-१२;

यूहन्ना २०:१-१०

१६ ब्लप्बा न्हबा धिन निमाहेन्से थेनोन धिन-कुनु इयसे मरियम मग्दलिनी, याकूबला आमा मरियमदेन सलोमीसे येशूला लासरी फोर्बाला लागिरी ज्यबा बास्ना खबा छ्युगु ग्लुजी। २ न्हडगरदड आइतवार स्थोरी धिनी फेबा धुइरी थेनीगदे येशूदा थान्बा धुर्सारी निजी। ३ “यहाडदा थे धुर्साला म्पारी मुबा युडबा खाल्से

ब्लिड्सी पिन्ना?” भिसी थेनीगदे ग्यामरीक्यार ताम लबान निजी। ४ तर धुर्साला डाच्छापट्टि धोसी च्यामा, थे घेन युडबा डाच्छान ब्लिड्सी थान्बा म्प्राड्जी। ५ थेनीगदे धुर्सा न्हडरी वाड्सी च्यामा, धुर्साला दाहिनेपट्टि तार क्वान क्वान्सी चिबा भ्योन म्हि गिकदा म्प्राड्जी। चु म्प्राड्सी थेनीगदे लोड्जी। ६ तर थे भ्योन म्हिसे थेनीगदेदा “थालोड्गो! क्रुसरी साइबा नासरतला येशूदा एनीगदेसे म्हाइबान मुला भिबा ताम डादा था मुला। थेदा सिबाग्याम सोना लसी जिन्बा मुला। येशू चुरी आरे। एनीगदेन खसी थेदा थान्बा ग्ला च्यागो। ७ दाहेन्से निसी थेला चेलागदेदा ओच्छे खास लसी पत्रुसदा ‘एनीगदे भन्दा डाच्छा येशू गालील अञ्चलरी फेप्बान मुला। थेसे सुड्बा हड्दोन एनीगदेसे थेरी थेदा म्प्राड्ला भिसी पाड्सी पिन्गो’ ” भिसी भिजी। ८ जमाहेन्से थेनीगदे लोड्सी फितफित धर्सी धुर्साग्याम थोन्सी निजी। ओच्छे थेनीगदेसे चु ताम खालैदा आपाड्नी। तिग्दा भिसम थेनीगदे ल्हानान लोड्बा मु

### येशू चेलागदे मुबा ग्लारी फेप्बबा

मत्ती २८:९-२०; लूका २४:१३-५३;

यूहन्ना २०:११-२३; मुल चेला १:४-११

९ आइतवार स्थोरीन येशू सिबाग्याम सोमाहेन्से जम्मान भन्दा डाच्छा मरियम मग्दलिनी मुबा ग्लारी फेप्जी। थे मरियमला ल्हुइग्याम येशूसे गोर

निस म्हड ताप्बा मुबा।<sup>१०</sup> जमाहेन्से मरियम मग्दलिनी येशूला चेलागदे मुबा ग्लारी निसी चु ताम थेःना लजी। सेमरी ल्हानान दुख तसी थेनीगदे क्रासी चिबा मुबा।<sup>११</sup> येशू सोसी हाड मुबा ग्लारी फेप्खजी भिबा ताम मरियमसे थेनीगदेदा भिजी। तर थेनीगदेसे चु ताम पत्याब आतनी।

<sup>१२</sup> जमाहेन्से चेला न्ही नाम्सारीक्यार निबान लबा धुइरी हाडला डाच्छापट्टि येशूदा अर्गुन रूपरी म्राड्जी।<sup>१३</sup> ओच्छे थेनीगदे स्थहान्दो चेलागदे मुबा ग्लारी निसी चु ताम थेःना लजी। तर स्थहान्दो चेलागदेसे थेनीगदेला ताम पत्याब आतनी।

<sup>१४</sup> जमाहेन्से येशू च्युक गिक चेलागदे चबान लबा धुइरी थेनीगदे मुबा ग्लारी फेप्खजी। ओच्छे थेनीगदेला सेम कोड्बादेन म्हिगदेसे येशू सिबाग्याम सोजी भिसी पाड्बा ताम विश्वास आलबासे लमा येशूसे थेनीगदेदा बड्जी।

<sup>१५</sup> येशूसे हाडला चेलागदेदा “एनीगदे जम्बुलिडला जम्मान ग्लारी निसी जम्मान म्हिगदेदा परमेश्वरला य्हुल्साला समाचार

थेःना लउ।<sup>\*</sup> <sup>१६</sup> विश्वास लसी बप्तिस्मा किन्बागदेसे थार्बा याड्ला। तर विश्वास आलबा जतिसे चा परमेश्वरग्याम सजाय याड्ला।<sup>१७</sup> ओच्छे विश्वास लबा म्हिगदेदेन छ्याम चुहड्बा चिनुगदे तला थेनीगदेसे डाला मिनरी म्हडगदे ताप्ला, ओच्छे छार छार ग्योइरी ताम लला।<sup>१८</sup> ओच्छे थेनीगदेसे पुख्खी चुड्सैनोन, बिख थुड्सैनोन थेनीगदेदा तिगै आत। थेनीगदेसे आखम्बा म्हिगदेथोरी या थान्सी प्रार्थना लमाहेन्से थे म्हिगदे खम्ला” भिसी सुड्जी।

### येशू स्वर्गरी फेप्बा

लूका २४:५०-५३; मुल चेला १:६-११

<sup>१६</sup> चुहड् लसी चेलागदेदेन छ्याम ताम लमाहेन्से प्रभु येशूदा स्वर्गरी भोजी। ओच्छे येशू परमेश्वरला दाहिने छ्यापट्टि मुल ठिरी धन्छ्याजी।<sup>\*</sup> <sup>२०</sup> जमाहेन्से चेलागदे जम्मान ग्लारी निसी येशूला बारेरी पाड्सी भ्रजी। थेनीगदेदेन छ्याम तसी प्रभुसे गे लजी। ओच्छे थेनीगदेसे थेःना लबा तामदा प्रभुसे उदेकला गेग्याम चु हिन्ना चीम भिसी विश्वास तना लजी।

१६:६ चु पदला ताम कोड कोड ग्रीक बाइबलरी आरे।

१६:१५ मुल १:८ १६:१६ मुल १:६-११